

摩

訶

止

觀

摩訶止觀卷第九上

天台智者大師說

○第六觀禪定境者夫長病遠行是禪定障立世阿毗曇云多諫諍多營事亦是禪定障復有多讀誦亦是禪定障文殊問菩提經云禪定有三十六垢垢卽是障上諸境得入到清涼池入流竟則不須觀禪境若魔事雖過而真明未發雖無別修以通修故發過去習諸禪紛現當置魔事觀於諸禪所以者何禪樂美妙喜生耽味垢膩日增若謂是道墮增上慢若呵棄者全失方便如此等過不可具記雖免魔害更爲定縛如避火墮水無益三昧爲是義故須觀禪境但

禪支諸定助道有力大小乘經皆共稱美若四禪八  
定毗曇成實明之委細自性九禪地持十地甚爲分  
明今亦畧示其發相麤爲四意一明開合二發因緣  
三明發相四修止觀初明開合者禪門無量且約十  
門一根本四禪二十六特勝三通明四九想五八背  
捨六大不淨七慈心八因緣九念佛十神通此十門  
與五門十五門云何同異但有開合之異耳開五爲  
十者開數息出特勝通明開不淨出背捨大不淨慈  
心因緣守本念佛門毗曇名界方便禪經稱念佛此  
亦守本神通約九禪上發不專據一法合十五門爲  
十者數息不淨各有三則不合慈心有三但合爲一

卽衆生慈也沒二名者禪是門戶詮次事法法緣是  
乘入理觀無緣是大乘入理觀沒理去二存事唯  
若開者卽屬二乘菩薩兩境中攝因緣亦三門三  
世輪轉麤果報一念明義細細故附理麤故屬事今  
沒細存麤但稱三世門也念佛亦三但取念應佛耳  
神通但取五通若但取五門有所不收若取十五義  
濫於理是故簡理開事雖開合不同各有其意次明  
漏無漏若依毗曇判此十禪皆名有漏緣諦智修名  
無漏禪不爾但緣事修名有漏禪成論亦爾根本等  
是有漏空無相心修名無漏今小異彼當十禪體相  
是有漏通是事禪若胡瓜能爲熱病作因緣者小當

分別四禪世間本有凡夫外道共專修此者祇發有漏自行十二門化他讚法讚者大經云所謂四十八年卽此意也十六特勝通明佛不出世利根凡夫亦修此禪而不發無漏如來若說亦發無漏比於餘禪其力雖弱交勝根本爲是義故稱亦有漏亦無漏九想等是出世客法雖是事法能防欲過不俟諦智能發無漏如迦絺那五百羅漢人人七徧爲說四諦不能悟道佛說不淨卽發無漏厭患力強故判屬無漏若言非無漏者不應稱爲聖戒定慧聖之言正正豈過無漏大經云聖行者諸佛境界非二乘所知佛說此法二乘奉行故名聖行今佛說聖法二乘行之何

得非無漏又大品云根本是世間法施不淨等是出世法施既言出世豈非無漏又云九想開不淨不淨開身念處身念處開三念處三念處開三十七品三十七品開涅槃涅槃初緣豈非無漏若言事禪應是有漏者譬服二石一熱一冷雖同事禪應漏無漏異若無漏緣稱無漏者六地斷見七地斷思此亦是緣亦應無漏六地七地斷見思者終不單用根本會須諦智寄此位發單用根本非無漏緣不淨等不爾直以不淨能爲作緣云所以不取十想者前三見諦中四思惟後三無學皆屬理攝故不取不取八念者有人修九想無怖又念佛門已攝故不取慈心觀兩屬

若依根本起慈屬有漏若依不淨等起慈屬無漏慈  
無地位約他階級依根本成衆生緣依背捨成法緣  
因緣亦無地位念佛五通皆約他階級例如慈心兩  
屬云次來意不同問此中十門與次第禪門及對治  
云何同異荅次第禪門爲成禪波羅蜜禪善根利故  
禪門先發後驗善惡此中爲成般若禪善根鈍先阻  
煩惱遇業遭魔後始發禪對治中爲破遮障修成助  
道今此任運自發仍爲觀境禪門雖同各有其意云  
次明深淺不同者四禪是根本闇證味禪凡聖通共  
薄修卽得特勝少有觀慧不味不闇證橫對念處豎  
對根本故先味次淨也通明觀慧證相深細細次於

惣也此三同是根本實觀治惑力弱九想正是假想  
初門前鋒伏欲故次列也九想但馱患外境未治其  
心故次八背捨也背捨雖破內外貪欲惣而未別緣  
中不得自在故次明大不淨破依正貪也雖惣別治  
貪未修大福德故次慈心雖復內治重貪外修福德  
不入因緣則非世間正見故次因緣三世輪轉無主  
無我成世正見也雖世正見緣底下因人福力微弱  
次緣上果福力廣大雖前來諸定未有力用轉變自  
在故次神通云次互發不同其次第互發凡有八種  
例陰界境可知云○二明發禪因緣者大經云一切  
眾生皆有初地味禪若修不修必定當得近情而望



劫盡不修久遠推之亦曾離蓋譬以誦經廢近則易  
習廢久則難習當知昔有次第習卽次第發乃至事  
修事發等云云如彼大地種類具足得雨潤氣各各開  
生生亦前後結果不俱梅四桃七梨九柿十雨緣雖  
同成實有異宿習如種止觀如雨禪發如果熟參差  
揔言八種耳是名內因緣發也又雖有應生之善必  
假威神方乃開發地雖有種非日不芽佛無憎愛隨  
緣普益若次第緣卽次第加乃至事修緣卽事加鴻  
鍾任擊巨細由桴加常平等淺深聽習大論云池華  
不得日翳死無疑善不被加沈溺未顯淨度經云衆  
生自度三佛於其無益淨度菩薩言衆生若不聞佛

十二部經云何得度二言相乖共成一意是名外緣發也○三明諸禪發相者若般舟亦發根本而少常坐等則多今且約坐論若身端心攝氣息調和覺此心路泯然澄靜怗怗安隱躡躡而入其心在緣而不馳散者此名麤住從此心後怗怗勝前名爲細住兩心前後中間必有持身法此法起時自然身體正直不疲不痛如似有物扶助身力若惡持來時緊急勁痛去時寬緩疲困此是麤惡持法若好持法持麤細住無寬急過或一兩時或一兩日或一兩寬稍覺深細豁爾心地作一分開明身如雲如影惛然明淨與定法相應持心不動懷抱淨除爽爽清泠雖復空淨

而猶見身心之相未有支林功德是名欲界定成論  
名此十善相應心閃閃爍爍不應久住今言欲定坯  
弱不牢稱爲閃爍非定如燈炎也又稱爲電光者彼  
論云七依外更有定發無漏不荅云有欲界定能發  
無漏無漏發疾倏如電光若不發無漏住時則又遺  
教云若見電光暫得見道如阿難策心不發放心取  
枕卽入電光電光亦是金剛金剛不孤因欲界入無  
漏無漏發疾譬以雷光非欲界定得此名也住欲界  
定或經年月定法持心無懈無痛連日不出亦可得  
也從是心後泯然一轉虛豁不見欲界定中身首衣  
服牀鋪猶如虛空罔罔安隱身是事障事障未來障

去身空未來得發是名未到地相無所知人得此定  
謂是無生忍性障猶在未入初禪豈得謬稱無生定  
耶如灰覆火愚者輕蹈之若依成論無未來禪故云  
汝說未來禪將非我欲界定毗曇則有尊者瞿沙釋  
論具出之佛備兩說而論主偏申耳今則逐人判之  
自有得欲界定累月住未到不久卽入初禪此但稱  
欲界不言未到有人住欲界不久在未到經旬故言  
未到不云欲界有人具久在二法故言兩定不可偏  
判今依大論備出之若節節邪正相如修證中委說  
但初禪去欲界近如壇界多難應須畧知初從麤住  
訖至非想通有四分退護住進退分又二一任運退

二緣觸退緣有内外外諸方便二十五種吐納失所  
是爲外緣觸退於靜心中三障四魔而生憂愛是名  
內緣觸退後或更修得或修不得此人甚多護分者  
善以内外方便將護定心不令損失住分者或因守  
護安隱不失或任運自住卽是任分進分者或任運  
進或勤策進各有橫豎橫豎各有漸頓若十二門一  
一而進是名漸進若一時具足是名頓進特勝通明  
品品而發是名橫漸一時俱發是名橫頓又於四分  
分分皆有四分具如修證中說云今且約豎論進分  
者從未到定漸覺身心虛寂內不見身外不見物或  
經一日乃至月歲定心不壞於此定中卽覺身心微

微然運運而動或發動痒輕重冷煖涇滑有人言用  
心微細色界淨色觸欲界身例如欲界淨色在諸根  
之上卽有見聞之用若依是義觸從外來若言一切  
衆生皆有初地味禪如大富盲兒竹中有火心內煩  
惱而不並起禪亦如是事障麓礙不能得發今修心  
漸利性障旣除細法仍起何必外來所以者何數息  
能轉心心轉火火轉風風轉水水轉地四大轉細故  
有八觸如麥變爲麴麴變爲糟糟變爲酒糟喻欲定  
酒喻初禪以麥爲本非外來也若定執自出外來墮  
自他性過今依中論破四性訖而論內出外來耳又  
八觸是四大動輕是風痒煖是火冷滑是水重涇是

地體用相添則有八觸耳若動觸起時或從頭背腰  
肋足等處漸漸徧身身內覺動外無動相似如風發  
微微運運從頭至足多成退分鬻發成住分足發多  
是進分動觸有支林功德功德畧言十種空明定智  
善心柔輒喜樂解脫境界相應空者動觸發時空心  
虛豁不復同前性障未除時明者罔淨美妙皎皎無  
喻定者一心安隱無有散動智者不復迷昏疑網心  
解靜利善心者慙愧信敬慚我不曾得此法以爲愧  
恥我今尚爾信一切賢聖具深妙法敬揖無量柔輒  
者離欲界憊候麤穢如惱牛皮隨意卷舒喜者於所  
得法而生慶悅樂者觸法娛心恬愉美妙解脫者無

復五蓋相應者心與動觸諸功德相應不亂又念持相應而不忘失或一日一月一歲安隱久住斂念卽來熏修旣久動觸品秩轉深是名豎發餘七觸豎發例此可知若動觸發已或謝未謝又發冷觸冷觸若謝未謝更發餘觸交橫如前八種是名橫發雖復橫豎前後以八觸十功德五支察之終不料亂亦不得念俱成何以故八觸四大水火相乖不得同時成然此八觸凡有八十功德莊嚴名字雖同而悅樂有異如沸羹熱臠鯖魚沈李味別樂殊餘六觸亦差別若欲界定中發八觸者悉是邪觸病煩惱觸具如修證中說今不論但約初禪八觸須簡邪正何以故一



是邊地去欲界近二帶欲界心邪得隨入如開門戶  
賊卽得進鬼入禪中禪非鬼也若不識者正觸壞唯  
邪惡在邪觸者還約八觸十功德明若過若不及如  
動觸起時直爾鬱鬱不遲不疾身內運動若遠自急  
疾手腳搔擾是太過若都不動如被縛者是則不及  
餘冷煖等亦如是又就動觸空明十種論若過若不  
及此中之空祇豁爾無礙是爲正空若永寂絕都無  
覺知者太過若鏗然塊礙是不足明者如鏡月了亮  
若如白日或見種種光色是太過若都無所見是不  
及定者祇一心澄靜若縛著不動是太過若馳散萬  
境此不及乃至相應亦如是是爲一動觸中二十種

邪相餘七觸合前則有一百六十邪法原夫正禪本  
應有邪所以有者如服菖蒲將得藥力而多瞋服黃  
精將得力而多欲非藥令爾藥推麤法麤法將出而  
盛若單欲界中但有邪觸增病增蓋無正功德若入  
色定則動八觸空明十功德復有百六十邪不可不  
識大論云有風能成雨有風能壞雨東北雲屯西南  
雲散禪亦如是八觸十功德此覺成禪百六十邪此  
覺壞禪若一法有邪餘法亦皆染著譬如一伴爲賊  
餘皆惡黨若初觸無邪餘法皆善也正禪五業者若  
初觸觸身在緣名覺細心分別八觸及十眷屬名爲  
觀廣者未得而今得故名爲喜恬愉名爲樂寂然名

一心唯靈二十三心數一時而發取其強者判爲五  
支五支悉是定體體前方便如上說成論明五支前  
後相次而起四支爲方便一心支爲定體大集以第  
六默然心爲定體有人言五支在欲界第九心或言  
在欲界定前此則非五支也今辨覺觀俱禪正就初  
禪判那得爾耶五支同起而有強弱相翳取成就者  
以判五支如一槌撞鐘初聲中細之異五支亦爾初  
緣覺相盛不妨已有觀等四支覺強觀未了覺息觀  
方明初已有喜觀息喜支成初已有樂樂未暢喜息  
則樂成初已有一心四支所動今樂謝一心成如初  
開寶藏覺是寶物亦知珍貴喜樂定想但未知是何

等寶次分別金銀別已領納生喜喜故受樂安快一心如人飽食無所復須亦如對五欲極睡故論云如人得寶藏云若四禪同以一心支爲體云何四異今分初禪是覺觀家一心故有四別若進二禪但呵覺觀初禪卽壞別義轉明若通者同用一心爲體釋五支名義相等具在修證云復次初動八觸功德猶麤若數數發則轉深利品或言三或言九或無量品更互娛樂功德叢鬧不得一心如恒奏妓似多人客麀對一已一已復來出散暫無薄斂復現若欲去之但呵覺觀初禪謝已卽發中間單定亦名轉寂心亦名退禪地亦名篋屑心於此單靜心中旣失下未發上

若生憂悔此心亦失若不悔者內淨卽發無復八觸  
受納分別故名一識定混四大色成一淨色照心轉  
淨與喜俱發無魔邪相以非邊境故喜已生樂樂謝  
入一心此禪喜動樂不安當呵喜喜謝入未到忽發  
三禪與樂俱起還是色法轉妙不倚喜生樂此正樂  
徧身受聖人能捨凡夫捨爲難此有五支謂捨念慧  
樂一心經論出之或前或後皆是修行小異耳此樂  
對苦呵樂卽謝亦有未到未到謝已發不動定還是  
色法轉妙不爲苦樂所動名不動定定法安隱出入  
息斷不苦不樂捨念清淨一心支雖爾猶是色法呵  
三種色滅三種色緣空得定不復是色心得脫色如

鳥出籠是名空定此定謝已亦入不到緣識生定名  
爲識處此定謝已緣無所有入無所有法相應名不  
用處舊云緣少許識若爾卽是所有處亦是用處何  
謂不用無所有耶此定過已忽發非想非非想此定  
不緣識處故非想不緣不用處故非非想更無上法  
可攀三界頂禪世爲極妙外道計爲涅槃實是闇證  
具足苦集垂盡三有還墮三途委悉明根本禪往修  
證中尋之○次明特勝發者若依律教應在不淨後  
依行在不淨前如律云佛爲比丘說不淨觀皆生厭  
患不能與臭身共住衣鉢屣鹿杖自害佛令放不淨  
修特勝大黃已豆瀉人太過身力弱者卽便弊之更

以餘藥並下並補補故是愛下故是策策勝根本愛  
勝不淨有觀名亦無漏對治力弱名亦有漏如廉食  
人噉豬豚鄙貯屎物而猶可強食之若六月臭豬蟲  
蠅所集不復可食特勝是實觀猶可從容不淨是假  
想不復可耐云特勝發者忽見氣息出入長短知來  
無所從去無所至入不積聚出不分散若約根本卽  
是麤細住若見息來去徧身若約根本是未到地而  
根本闇證謂無身牀鋪等者非實無也如灰覆火上  
愚者輕蹈之如夜噉食如膏觸婦皆不暢其情今有  
觀慧見息徧身而定心明淨安隱故異闇證也又見  
身中三十六物如開倉見穀粟麻豆若對根本卽初

禪位前八觸觸身倉心眼不開不見內物特勝既有  
觀慧觸開身倉心眼卽見三十六物肝如菉豆心如  
赤豆腎如烏豆脾如粟大小腸道更相應通血脈灌  
注如江河流內有十二物肝心淡癯等中有十二膜  
膚肋膏等外有十二髮毛等出入息統致其間不淨  
無常苦空無我一切身行皆休終不爲身而造諸惡  
是名除諸身行若對道品是身念處若對根本卽是  
覺觀兩支心眼初開是覺支分別三十六佛無謬是  
觀支心受喜對喜支前喜名隱沒有垢味今喜不隱  
沒無垢味卽是法喜非是受喜也心受樂者亦如是  
非受樂樂知樂中三受皆無樂名樂支受諸心行是



一心支知衆心是一心不同根本計實一心也若對道品皆受念處心作喜心作攝者前喜從三十六物生此直就心作喜故知對二禪大集明二禪但三支無內淨今心作喜意似於此作攝者喜動則散若作攝得入一心根本但內淨受喜特勝有觀慧恒攝喜心心作解脫者此對三禪根本之樂倚喜徧身受凡夫捨爲難特勝有觀慧則無愛味故言解脫從心作喜至心作解脫皆是心念處也從觀無常者對第四禪餘處亦觀無常未是別治得不動定味之爲常今有觀慧知離苦樂而終是色法猶是無常不應生染故稱無常從觀出散對空處滅三種色如鳥出籠故

言出緣空故言散雖緣空亦有觀慧觀離欲是對識  
處緣空多則散散名爲欲特勝觀慧離是散心故名  
離欲觀滅對無所有處特勝觀慧觀識若多若少皆  
無故名觀滅觀棄捨對非想非非想處棄識處及無  
所有處更有妙定名爲非想非非想凡夫妄謂涅槃  
佛弟子知其雖無麤煩惱而有細煩惱而無愛味故  
稱淨禪從無常至棄捨皆名法念處此十六法橫豎  
對治法節節皆異根本闇證功德則薄如食無鹽特  
勝功德則重如食有鹽委論發相具如修證中云○  
次通明禪發相者上特勝修時觀慧猶總見三十六  
物證相亦總通明修時細妙證時分明華嚴亦有此

名大集辨寶炬陀羅尼正是此禪也請觀音亦是此  
意修時三事通修能發三明六通又修寶炬時乃入  
入滅受想定當知此門具八解脫三明六通故名通  
明也大集辨此五支名目謂如心覺大覺思惟大思  
惟觀於心性故名覺支觀心行大行徧行是爲觀支  
如實知大知心動至心喜是爲喜支身安心安受於  
樂觸是爲安支心住大住不亂於緣是名定支初觀  
三事皆融證時三事皆一故名如心覺覺於真諦色  
息心泯一無異又識俗諦皮肉骨等皆有九十九重  
覺五藏生五氣亦見身中蟲戶行來言語無細不了  
覺託胎初陰過去無明業是蠟現在父母精血是泥

過去業不住故名印壞現在託識名色具足故名文  
成住在生藏之下熟藏之上子腸中形甚微細唯有  
一念妄想色心相依如有如無如夢業行力故自然  
能起一念思心感召其母母便思青色呼聲膠氣酢  
味因此念力生一毫氣氣變爲水水變爲血血變爲  
肉母氣出入以相資潤便得成肝藏向上成眼向下  
成手足大指若思白色哭聲腥氣辛味便成肺藏上  
向爲鼻下向爲手足第二指若思赤色語聲焦氣苦  
味便成心藏上向爲口下向爲手足第三指若思黃  
色歌聲香氣甜味便成脾藏上向爲舌下向爲手足  
第四指若思黑色吟聲臭氣鹹味便成腎藏上向爲

耳下向成手足第五指覺身分細微例皆如此思惟大思惟者卽是思惟真俗也觀於心性者卽是空也若真若俗同入心性請觀音云一一入於如實之際如此覺支與上倍異心行大行者上覺支是解今心行去是觀行心行於世諦故名行行真諦故名大行三事俱行故名徧行心住者於俗諦得一心大住者於真諦得一心不亂於緣者雖見真俗無量境界而於心不謬也具明其相備如通明觀中廣說發此定時見身息心同如芭蕉相無有堅實是未到地相見此三事同如泡沫相是初禪見三事同如浮雲相是二禪見三事同如影相是三禪見三事同如鏡像是

四禪滅此三事皆空滅空緣識滅識緣無所有滅無所有緣非想非非想滅非想非非想三種受想而身證滅受之法以成解脫有俗觀故名亦有漏有真觀故名亦無漏此禪事理既備階位具足成論人應用此明道定入八解脫於義爲便而不肯用阿毗曇約八背捨得有事理俱異外道成俱解脫人成論但有理無事便無俱解脫人約外道禪爲事禪亦應約十善爲戒世智爲慧戒慧既異外道定何意同是則客醫無客定八術不成委論其相具在修證中說云云○次明不淨禪發者先就九想又爲兩一壞法人二不壞法人若壞法人修九想一脹想二壞想三血塗想

四濃爛想五青瘀想六噉想七散想八骨想九燒想  
此人但求斷苦燒滅骨人急取無學不欣事觀既無  
骨人可觀便無禪定神通變化願智頂禪雖言燒滅  
實有身在例如滅受想而身證云此人好退如毗曇  
有退相四果如沙住井底阿含云三果退戒還家毀  
失律儀不失道共俗人生謗言無聖法佛言欲飽起  
厭不久當還更求出家諸比丘不度佛卽度之便得  
羅漢阿難問言大德是學退無學退荅言學退若然  
卽是世智斷惑慧解脫人故得有退非無漏智斷一  
品惑進一品解而有退也若發此九想無諸禪功德  
者是壞法人也若不壞法人九想者從初脹想來住

骨想不進燒想得。有流光背捨勝處觀。練薰修神通。變化一切功德具足。成俱解脫人也。若修時愛多。觀外見多。觀身見愛等。內外觀若發時。準此可知。於坐禪中忽見死屍在地。言說方爾。奄便那去。氣盡身冷。神逝色變。無常所遷。不簡豪賤老少。端醜無逃避處。慈父孝子。無相代者。屍腥在地。風吹日暴。與本永異。或見一屍多屍。是大不淨觀相。或滿一聚落一國土。或一屍色變。或多屍色變。死屍雖非九數。是諸想之本。故先說之。是等死屍。顏色黯黑。身體洪直。手足葩花。臃腫。臍如韋囊。盛風九孔。流溢甚爲穢惡。行者自念我身如是。未離未脫。觀所愛人。亦復如是。是相



發時得一分定心黥黥安快須臾之間見此脹屍風  
吹日暴皮肉破壞身體坼裂形色改異了不可識是  
名壞相又見坼裂之處血從中出散溜塗漫處處斑  
駁灌溢於地臭處蓬勃是爲血塗相又見膿爛流漬  
滌滌滂沱如蠟得火是名膿爛相又見殘皮餘肉風  
日乾炙臭敗黥黥半青半瘀皴皴皴皴是爲青瘀相  
又見此屍而爲狐狼鴟鷂之所噉食紛葩鬬競爛裂  
拽挽是爲噉相又見頭手異處五藏分張不可收斂  
是爲散相又見二種骨一帶膿膏一純白淨或見一  
具骨或徧聚落如是諸相轉時定心隨轉黥黥沈寂  
愉愉靜妙安快之相說不可贊不壞法人所觀齊此

未見此相愛染甚強若見此已欲心都罷懸不忍耐  
如不見糞猶能噉飯忽聞臭氣卽便嘔吐亦如捉淨  
法婆羅門而噉塗癰髓餅槌頭自責我已下矣若證  
此相雖復高眉翠眼皓齒丹脣如一聚屎粉覆其上  
亦如爛屍假著繒綵尚不眼視況當身近雇鹿杖自  
害況嗚抱姪樂如是想者是姪欲病之大黃湯如貪  
食人審知豬膾盛屎之物猶強喫噉見膾蟲臭更能  
食不前特勝力弱未決定除今觀力強姪火疾滅故  
云九想觀成時六賊稍已除及識愛怨詐兼知假實  
虛如是馱患何但除欲亦能發無漏亦成摩訶衍釋  
論解死變想竟仍說六波羅蜜四無量心諸師咸云

翻謬今明菩薩修初想卽具摩訶衍故廣出諸法後卽云乃至燒想亦如是那云脫落耶○次明八背捨發者前三番是根本味淨九想至一切處名爲觀九次第定是練師子奮迅是薰超越是修此四事定今先明背捨背捨又有總別總共二乘別在菩薩又背捨不定或因中說果名背捨爲解脫自有果中說因名解脫爲背捨若定判者斷惑究竟事理具足稱爲解脫若惑未盡定未備但名背捨背者厭下地及自地淨繫五欲捨者捨是著心故名背捨若破愛多發外相如前說若破見多發內相內相者卽八背捨也一內有色外觀色乃至第八滅受想背捨所言內有

色外觀色者不破不壞內色內觀白骨皮肉而外觀  
死屍等若修相具如禪門今畧示發相行者忽見自  
身足指皮皸如泡漸漸至膊至胛通身到頂斯須洪  
直舉身脹急五指葩花兩腳如柱腎腹如甕頭如盆  
處處臙脹如風滿韋囊此相發時或從腳至頂或從  
頂至腳滿一繩床皮急肉裂將欲綻潰旣潰膿流浸  
漬溼釋又從頂至足皮肉自脫唯白骨在支節相柱  
罄然不動皮肉墮落聚在一處猶如蟲聚汙穢鄙醜  
若發此相深患其身狀之如糞何況妻子財寶而生  
恪惜薩埵亡身鹿杖所害者皆得斯觀內不計我外  
不愛所低頭慙愧狀心相續云大經云除卻皮肉諦

觀白骨一一節間皆今繫念逆順觀察令骨淨潔是  
名內有色相外觀色者外見死屍臃脹膿壞滿一聚  
落一國土如前九想所觀不淨故言外觀色位在欲  
界定此法增進見骨起四色青黃白鵠煜煜爚爚將  
發不發青色青光乃至鵠色鵠光狀如流水光籠骨  
人如塵霧鏡日若心緣足光隨向下若心緣頭光隨  
向上以青光力映蔽十方悉見青色如須彌山隨方  
色一乃至鵠色亦如是若此光色將發不發位在未  
到地定如是遠久光應自發若不發者當攝心諦觀  
眉間放之便發狀如竹孔吐煙初乃小小後則散大  
四色宛轉從眉間出徧照十方豁爾大明一色亦有

十功德八觸五支正邪等相初色發時名覺分別八  
色名爲觀昔雖知肉中有骨不知骨中八色昔所未  
見慶喜悲慙名爲喜支此色發時深有樂法心地恬  
愉名爲樂支定心湛然安住不動黯黯轉深空明智  
定信敬慙愧不生謗毀離蓋相應若冷煖等叢叢皆  
無謬亂故稱叢林但此中動痒空明五支等相心眼  
開明法深樂重不同根本亦異特勝通明彼帶皮肉  
觸不通暢今觸骨人其法深妙若論邪相入八色者  
或見青色不甚分明斑駁不好卽是邪相七色亦如  
是闇證無觀慧如夜多賊今禪有觀如晝少僞設有  
易卻若三藏云八色是色界法觸欲界骨人致諸功

德起此依根本有漏作如此說大乘明戒定慧法悉不可盡何以故命朽戒謝無作不滅定雖伏惑斷在不久如蠱入身殘藏害命卽雖未死勢不久存慧道無失初果七死無漏湛然當知戒定是無漏法若爾八色之光便是界外法也若發此相初背捨成位在初禪成論云兩背捨欲界攝淨背捨色界攝四背捨無色界攝滅背捨過三界毗曇云初二背捨通欲界及二禪淨背捨在四禪言三禪樂多不立背捨復有人言三禪無勝處四禪無背捨三家互異今依釋論初背捨二勝處初禪攝既有五支驗是初禪也二內無色以不淨心觀外色者骨人是精血所成應須呵

滅析骨四微大乘體法知骨從心生心如幻化骨人  
虛假骨人自滅如好馬任人意如好人共事去來無  
振骨人去已新法未來喜多退墮以不淨心但觀外  
色外色者外死屍等又外者骨人所放八色也所以  
觀外色者此去欲界猶近須觀外不淨若修外骨人  
別有觀法今但論法發忽見骨人自然消磨但有八  
色及外不淨在骨人滅時位在中間又見八色與內  
淨法同時俱起青黃等光更作一番增明內淨喜樂  
一心四支功德轉勝於前是爲二背捨位在二禪三  
淨背捨身作證者初禪二禪非徧身樂四禪無樂何  
所爲證成論人四禪共淨背捨今以兩禪共淨背捨



既言三禪有徧身樂可以爲證卽是其初成就在四  
禪能具足勝處故知淨背地位在三禪也淨者釋論  
云緣淨故淨八色已是淨蓋而未披淨緣瑩練淨色  
極在四禪此色起時瑩於八色更轉明淨故言緣淨  
故淨徧身受者樂之極在三禪故總此二禪爲淨背  
捨也淨有四義不淨不淨者欲界之身已是不淨而  
今臃脹故言不淨不淨不淨者除卻皮肉諦觀白  
骨無復筋血如珂如貝故言不淨淨淨不淨者是眉  
間所出八色光明光明是淨未被練治故言淨不淨  
也淨淨是第三背捨更被淨緣練治也故言淨淨四  
空背捨者過一切色滅有對色不念種種色一切色

是欲界内外色有對是五根所對此兩色前三背捨  
已滅但有八色隨心轉變故言種種色呵色緣空更  
無別法但入空定若凡夫多染保著空定聖人深心  
智慧利直去不迴故名背捨苦緣空多則散虛誑不  
實捨空緣識識法相應名識處背捨又識生滅無常  
虛誑無復所緣但有能緣故言無所有處識處如癰  
無所有處如瘡捨識無識卽是非想非非想此無想  
猶有細煩惱今捨能緣非想之受想亦無復能滅之  
想定法持身泯然無想如冰魚蟄蟲若以所滅爲名  
與攀上厭下何異今從能滅自地亦滅他地得名故  
言滅受想背捨具如修證中說毗曇明得滅定是俱

解脫不得此一定但名慧解脫成論得電光名慧解脫具得世間禪名俱解脫成論後四更無別法以無漏心修此可然前三何意無別法而約外道禪耶云若過去曾得八定故發宿習而滅定一種不得無漏修則不成故不論宿習也九次第定超越等約三藏者無有凡人修於此定故不論發宿習也若約大乘亦應有此義今所不論○次明大不淨觀發者亦名大背捨前所觀所發除卻皮肉諦觀骨人死屍不淨或一屍兩屍城邑聚落不淨流溢等但約自他正報故言小不淨也約此而論狀背故名背捨亦是總別相云若大不淨觀何但正報流溢不淨依報宅宇錢

財穀米衣服飲食山河園林江淮池沼絰是色法悉  
皆不淨蟲膿流出臭處腥臊舍如丘墓錢如死蛇羹  
如屎汁飯如白蟲衣如臭皮山如肉聚池如膿河園  
林如枯骨江海如汪穢大經云美羹作穢汁想卽此  
觀也於坐禪中忽如上見見此大地無一好處依正  
不復可貪是名大不淨發也如初然火加功攢發煙  
炎蓋微火旣成勢不復擇薪乃至江河亦能乾竭初  
觀不淨止一屍一國姪心乍興乍廢今定力已成狀  
惡亦盛一切依正無非不淨欲心永息復次諸物有  
何定相隨人果報感見不同善業感淨色惡業感不  
淨色如諸天寶地寶宮人中富樂執諸瓦石變成金

銀善力所招依正俱淨如僧護經所說地獄獄相不  
同或見身肉爲地爲他所耕或見身如樹林衆所摧  
折或身如山如屋如衣凡一百二十種皆惡業所感  
招不淨色若執淨色保愛堅固以大觀力破大著心  
翻大顛倒成大不淨觀也何以故夫幻術法多是欺  
誑神通法得其道理凡一切物皆可轉變如蘇蠟金  
鐵遇煖流變如水遇冷成地此得解觀契轉變之道  
定力爾故若根本但除下地著不能除自地若小大  
背捨未是無漏但除下地自地著若無漏緣通則下  
自上皆除著也若人發大不淨入背捨亦大初禪攝  
若內無骨人外觀八色及依正兩報緣境大故名第

二大背捨二禪攝若以大不淨入淨背捨亦大乃至  
滅背捨亦如是若論大勝處者更執背捨令於緣轉  
變自在大論明鈍人修八背捨竟方修勝處一切處  
中根修三背捨竟於四禪中修勝處等上根祇修初  
背捨卽修一切法也今處中說若多若少者還約依  
正一屍爲少二屍爲多如是傳傳可解一衣一食一  
山河爲少無量衣食山河爲多初修從少至多今發  
亦應爾若好若醜者善業端正爲好惡業鄙陋爲醜  
此二皆於我美者爲好於我惡者爲醜此二皆有智  
慧爲好皆有愚癡爲醜此二富貴爲好貧賤爲醜如  
此好醜俱不淨山河國土衣食屋宅若好若醜俱不

淨又依正俱醜骨人所放八色爲好又八色亦醜  
練爲好好醜皆不淨此兩勝處初禪攝若內無色相  
外觀色若多若少若好若醜勝知勝見者內滅骨人  
外有八色又有依正多少好醜如前說云勝知見者  
此心勝色不爲色所縛心能轉色故言勝知也勝見  
者淨不淨等皆於已心自在觀解成就故言勝見也  
此兩二禪攝若勝處成時身尚不惜況財物他身耶  
上古賢人推位讓國還牛洗耳皆是昔生經修此觀  
自然成性無復愛染不得此意貪之至死何能忽榮  
棄位耶後四勝處在四禪中成就三禪樂多不能轉  
變就聲聞法謂言如此於菩薩法禪禪轉變何得無

耶大論云青黃赤白此從實法瓔珞云地水火風此從假名互得相攝此四勝處內外色盡但有八色唯有多少轉變無有好醜轉變也十一切處在四禪中初禪覺觀多二禪喜動三禪樂動不得廣普徧一切處唯不動念慧則能廣普以青徧十方十方皆青餘色亦爾故名一切處若一切入者以青徧一切時黃來入青亦徧一切處青黃本相不失相入又不相濫餘色相入亦如是是名一切入此乃內心放色徧一切處那得以外樹葉爲緣徧一切處耶內心無法安能轉變外樹葉耶先能變心方能變葉耳大論取優鉢羅花者恐人不解借外喻內不可執喻爲正義若



通明觀內無骨人不放八色修勝處時借外緣或可  
應爾不壞法人內自放不須外也

摩訶止觀卷第九上

摩訶止觀卷第九下

天台智者大師說

復次菩薩修勝處具衆行者若不達依正可起貪慳此觀若明身尚欲捨況惜已物而貪他財是則名檀得如此觀不爲財色而破於戒害彼財主引物自歸欺詐百端而求全濟決無此理是則名尸得此觀時若他觸惱及以侵奪終不生嗔諍於糞穢是則名忍是觀成時不倚不淨屍身不淨國土間退定心是名精進此觀能具觀練熏修神通變化願智頂等是則名禪得此觀時一切法能所皆不可得不生不滅畢竟清淨是則名慧一切道定法門皆於勝處轉變成

就心定自在迴轉去住作諸法門隨心卽成如快馬  
破陣亦自制住是時明淨無復魔事心使於魔魔不  
能破心也行四三昧人若發得此法多轉入五品弟  
子位何故爾助道力大能疾近清涼池齊此是發觀  
禪亦是發摩訶衍禪相若練熏修凡夫尚不得學無  
發可論若別出經論故不俟言也○七明慈心發者  
慈倚根本前後云忽緣一切衆生取其樂相無怨無  
惱悅心適意或見得人中樂或見得天上樂善修得  
解定心分明無一衆生不得樂者初躡躡細靜後轉  
深定但所緣有三若緣親人得樂名廣中人名大怨  
人名無量又緣一方衆生得樂名廣四維名大十方

名無量此定有隱沒不隱沒若心緣衆生決定作得樂想心甚分明而所緣處不見衆生得受於樂是內不隱沒而外隱沒復有內心明淨外見得樂是爲內外俱不隱沒若先得此定後發五支功德者初覺衆生悉皆得樂心與定合自心亦樂善修得解名覺支分別得樂或人中天上無量差品皆悉明了名觀支怨親平等無復畏怨愛親之苦名喜支喜支動息心神愉懌亦如所緣得樂之相名樂支定法轉深持心不動名一心支此名同根本而法味永異如糖蜜和水冷同味別若發單根本報止梵衆梵輔若得慈定則報爲梵王其果旣勝因亦大矣若先得根本後加

慈定根本益深也又於慈定中發一禪內淨四支成就又發三禪樂具五支成就又發四禪一一與諸禪相應支林具足而法味倍增如前喻但慈心本緣他得樂內受樂定外見他樂此相齊三禪四禪但見他得樂內無樂受以捨苦樂故是爲小乘如此分別佛或時破執爲緣言慈心福至徧淨悲心福至空處喜心福至識處捨心福至不用處但菩薩恒與慈悲俱何地而無慈悲慈悲熏一切善豈止齊三禪耶此一往語耳若先發根本後發慈定亦如是然皆闡證隱沒或內不隱沒而外隱沒云若依特勝通明發慈定者所依之定自是一邊能依之慈附起不濫此定旣

有觀慧慈定亦不隱沒五支法味倍勝根本或因慈定而發特勝通明此之慈定亦不隱沒禪味亦深或因慈定發小大不淨不淨取衆生破壞相則無衆生可緣誰得此樂雖無衆生有漏中樂而有涅槃樂是發法緣慈也問慈緣衆生淨相無瞋惱取其好相不淨觀破壞衆生取其惡相云何相發荅此亦無妨如雖見不淨不妨又見淨人端正衣裳雖生慈定不妨不淨慈定亦能莊嚴背捨等使功德倍深勝單發不淨或互相發云餘三無量心發更互準慈定可知若四無量附根本發卽成有漏附特勝通明發卽成亦有漏亦無漏附不淨發卽成無漏因緣不同慈定等

深淺百千萬種不可稱說譬如欲界四大色造種種地青黃赤白高下不同造種種樹木草果甘苦辛酸藥毒香臭造種種人端醜聰鈍貧富善惡造種種禽獸毛角飛走無邊種類差品不混各隨性分任力所能如薄福人但資稗粟不信有甘蔗蒲桃色界淨法亦復如是轉變支林種種滋味更相添糝而不混和乃至四無量心彌復曠大何以故衆生無量故想其得樂亦復無量諸法無量附諸法發支味亦無量不可稱計衆生薄福不信禪定設信一法不信無量功德如山左不識珍羞井蛙之非海若甚可憐愍其能信者知聖境難思不生誹謗云○八明因緣發者行

人有大功勳諸佛賜以禪定三昧或過去宿習而因緣定發前後云於坐中忽然思惟心所緣處或緣善心或緣惡心能緣所緣卽是有支有能含果此有由取以心取善惡而得有有若不取者亦無此有故知有從取生復知取從愛起愛故可取如愛色死取不愛則不取愛因受生由領受善惡所以愛生若無領受愛則不生又觀受由於觸六塵來觸六根故得有受無觸則無受經云六觸因緣生諸受故受由於觸又知觸由諸入門若無六識統六根則不能涉入諸塵而生於觸觸由於入由名色若但有色色不能觸如死人若但有名名亦無觸如盲聾人色心合故



則有於觸色卽色陰心卽四陰了別此色名識陰領  
納此色名受陰行起貪瞋名想行兩陰五陰具足故  
有覺觸當知觸由名色名色由初託胎識初託胎名  
歌羅邏此時卽具三事一命二煖三識是中有報風  
依風名爲命精血不臭不爛名爲煖是中心意名爲  
識由識託胎故有凝蘇薄酪六胞開張名色和合當  
知名色豈不由識識由業行過去持五戒善業業使  
人中受名色過去破五戒惡業業使三塗受故知識  
由於業業卽行也行由無名癡愛造作衆行使識流  
轉從過去來今從今愛取緣有有能舍果招未來生  
死三世因緣空無有主如是思惟觀智起時人我邪

計卽破定心帖帖從麓入細欲界未到乃至根本五  
支功德次第而起覺因緣空無有主名覺支三世流  
轉更相因賴明識無差名觀支得因緣智深識三世  
豈不欣幸名喜支定法持心恬愉美妙名樂支定心  
湛然無緣無念名一心支此因緣三昧是慧性此慧  
明故卽發根本或根本與因緣相和法味淳濃不同  
單發五支此三昧亦有隱沒不隱沒若內心但解因  
緣法不生我倒者但與根本相應闇有此解名爲隱  
沒若三昧發時其心明淨見歌羅邏五炮開張生處  
住處亦見行業善惡所爲好醜亦見未來生死之事  
三世分明是名不隱沒相此二皆有空明十法成就

是名根本由因緣發乃至特勝通明背捨等隱沒不  
隱沒由因緣發亦復如是若因根本發因緣者忽於  
定中思惟根本諸定皆是因緣所成所成能成卽是  
有此麤細住舍炎魔兜率天有有生必有死欲界定  
亦是因緣有有則舍果應受化樂天生生則有死未  
到定亦是因緣有有則舍果應受魔天有初禪相應  
卽舍彼有乃至非想非非想亦如是如是等有皆由  
於取取初禪相如前二十五方便中種種希望取其  
相貌故知有由於取取又由於愛以聞人說初禪功  
德而生愛味又知此愛由受以聞彼功德而領受之  
而起愛也又知此受由入入卽是根無根入無所受

受又由觸塵觸故有入觸由名色五陰合故有觸名  
色由初識三事三事由業而來受身業由無明致有  
生識乃至老死上至非想下至麤住皆識十二因緣  
一一明了乃至特勝通明等因根本發例可知云云此  
觀既破我倒與界方便破我意同但依禪經受因緣  
三昧名耳三世推尋雖是慧性猶名停心心心得停住  
如密室無風可作念處觀也念處觀成方名聞慧聞  
慧乃是理觀如富那領解云我已解已知汝云何知  
若知無明不起取有卽聞慧意此因緣觀在念處前  
未有是力故屬事觀也此因緣門隨機不同纓珞明  
十種大集明果報一念諸師多傳三世龍樹作中論

初明因緣品論師謂攝法不盡不以因緣爲宗但是  
世諦破因緣盡是真諦故以二諦爲宗今言何品非  
世諦而皆破盡此乃通途非別意也論初通觀因緣  
次深深品等別破愛取支六情品別破苦支乃至後  
兩品別出聲聞觀因緣通別等意皆觀因緣豈不以  
因緣爲宗北師取後品中救義六因四緣爲宗此乃  
是生滅因緣後兩品意非論正宗佛去世後人根轉  
鈍取著因緣決定相不解佛意故作此論明十二因  
緣觀門也今旣發因緣法故約之明止觀例爲十意  
云思議境者過去無明心中作於黑業諸不善行成  
云三途界作諸白業及不動業成三善界若轉無明爲

生滅明名下智觀得聲聞菩提轉有漏行爲出世助  
道行七種學人殘業未盡猶生善界若無學用無漏  
業及著真諦愛與根本無明合生方便度受彼名色  
與彼愛瞋而起取有是聲聞界若翻無明爲不生不  
滅之明是知中智得緣覺菩提請觀音云觀十二因  
緣如夢幻芭蕉成緣覺道意在於此轉有漏行爲無  
漏助道結業盡不盡同前是爲緣覺界若轉無明爲  
般若轉不善行爲五度以未發真猶具界內十二因  
緣是六度界若轉無明爲空慧轉行爲六度六七地  
前斷惑未盡皆同前斷盡生彼福慧小勝耳是名中  
智觀得通教菩提若轉無明爲次第明轉行爲歷別

行十信住斷未盡十行向斷盡皆同前是名上智觀  
故得別教菩提若轉無明爲佛智明從初發心知十  
二緣是三佛性若通觀十二緣真如實理是正因佛  
性觀十二因緣智慧是了因佛性觀十二緣心具足  
諸行是緣因佛性若別觀者無明愛取卽了因佛性  
行有卽緣因佛性識等七支卽正因佛性何以故苦  
道是生死變生死身卽法身煩惱是闇法轉無明爲  
明業行是縛法變縛成解脫卽三道是三德性得因  
時不縱不橫名三佛性修得果時不縱不橫如世伊  
字名三德涅槃淨名云一切衆生卽大涅槃卽是佛  
卽是菩提乃此意也是名上上智觀得佛菩提若五

品未斷同學人鐵輪長別苦海同無學雖復變易五  
根生福迥異釋論云二乘受法性身諸根闇鈍以其  
於佛道紆迴故若別圓能破無明直開苦道如實之  
法從實法得實報直於行有具足諸行感得依正无  
有罣礙根利福深不同中下若三賢十聖住於果報  
悉成就彼十二因緣等覺餘有一生因緣在若最後  
窮無明源愛取畢竟盡故名究竟般若識等七果盡  
故名究竟法身行有盡名究竟解脫雖言斷盡無所  
可斷不思議斷不斷無名愛取而入圓淨涅槃不斷  
名色七支而入性淨涅槃不斷行有善惡而入方便  
淨涅槃淨名云以五逆相而得解脫亦不縛不脫如



此而推十二因緣卽是一切無量佛法是名不可思議境也復次十二緣對法華中十如者如是性對無明淨名云若知無明性卽是明性如是相對行體對識等七支力對愛取作對有因又是無明愛取之習因緣對行有果對無明生智慧習果報對行有五種涅槃本對三道三種佛性未對三德涅槃復次對十境者十法界陰入病患兩境對識等七支煩惱見慢等境對無明愛取業魔禪二乘菩薩等對行有等支復次十二因緣十如十境在異心中是生滅思議在一念心中是不生不滅不可思議華嚴云十二因緣在一念心中大集云十二因緣一人一念悉皆具足

此猶存畧若一人一念悉皆具足十界十如十二因緣乃可稱爲摩訶衍不可思議十二因緣耳問十二門論云緣法實無生若謂爲生者爲在一心中爲在衆心中亦可得言在一念耶荅華嚴云一中無量無量中一大品云一切法趣無明是趣不過乃至一切法趣老死今說一心具十二因緣當有何咎復次言一念不同世人取著一異定相一念乃是非一非異而論一耳譬如眠法覆心一念之中夢無量世事如法華云真正發菩提心者若依生滅無生滅假名等十二因緣而起慈悲誓願者此非真正故華嚴云菩提心魔卽此意也若依不思議十二因緣起慈悲覆

度一切是名真正拔苦有二一拔十法界無明愛取  
行有五種因苦二拔十法界識名色七種果苦慈與  
樂亦爾謂與十法界觀無明愛取成慧行正道轉行  
有成行行助道是名與樂因觀十界名色七支皆安  
樂性卽大涅槃不可復滅名與樂果約此四義起四  
弘誓未度令度度十界七支生死之苦未解令解解  
十界無明愛取行有五支之集未安令安安十界無  
明愛取行有正助之道未得涅槃令得識等七支安  
樂涅槃也云云善巧安心者巧觀十界識等七支卽是  
法性不起無明愛取八倒迷惑名爲觀十法界行有  
等種種顛倒息故名爲止云云破法徧者橫破十界十

二因緣悉是一念一念不自不他不共不無因當知  
十界悉無生也豎破十界行有見思塵沙無知無明  
不生乃至四十二品不生不生名大涅槃善知通塞  
者達因緣真名通起見思著爲塞沈真爲不通達因  
緣事爲不塞於三道起法愛爲塞達因緣中理名爲  
通若於畚畚起無明愛取行有爲失若於畚畚悉有  
智慧名得或直就有作等四種苦集論塞四種道滅  
爲通或直就三假故爲塞破三假無生爲通通惑旣  
爾別惑亦然或直就四見起十使爲塞破見爲通云  
善修道品者若通論十界因緣中色法皆名爲身一  
切受法皆名爲受一切識法皆名爲心一切想行皆

名爲法若別論名色支中取色六入中取五入觸中  
取五觸五受生死支各取色分皆名身念處攝名色  
支中取識分六入中取意入生死支各取識分皆名  
心念處攝無明行名色支中取想行觸支中取法觸  
愛支取支有支生支中取想行死支中亦取想行皆  
法念處攝或時云無明是過去愛愛是汙穢五陰若  
現在論無明法念處攝行法攝識心攝名色身心兩  
攝六入緣六塵塵法攝入身攝觸法攝受還受攝愛  
汙穢身心兩攝取法攝有行攝生是色起死是色滅  
法攝問數人說生死皆是不相應行祇應法念處攝  
云何通三念處答大經云此五陰滅彼五陰續生如

蠟印印泥印壞文成故知生死之法不離五陰得作  
此說云若通別因緣諸色非垢非淨能雙照垢淨名  
身念處觀諸因緣通別諸受非苦非樂雙照苦樂名  
受念處觀諸因緣通別心識非常非無常雙照常無  
常是心念處觀諸因緣通別想行非我非無我雙照  
我無我是法念處此四能破十二因緣中八種顛倒  
八顛倒轉成四枯四榮亦是非枯非榮中間入涅槃  
見佛性也勤觀此四名正勤乃至八道如前說觀根  
本無四句不生不滅卽畢竟空此空具十八空十八  
空祇是一空方等云小空大空皆歸一空大品云一  
獨空是名空解脫門若入此空不取法性四相不受

不著不念不分別新舊內外云若心無依倚以無所見見真佛性以不住法住大涅槃是名無相解脫門是大涅槃非修非作非自故非因非他故非緣不共故非合非無因故非離無修無得名無作解脫門對治助道者前道品直緣理轉無明愛取以爲明雖具正慧不能得入何以故無明愛取是理惡與理慧相持復有行有事惡助覆理慧如賊多我一故須加修行有事善助開涅槃門若起慳貪行有轉爲布施行有則檀度善根生若破戒行有起轉爲持戒行有尸善根生若瞋恚行有起轉爲忍辱行有羣提善根生若懈怠行有起轉爲精進行有毗梨耶善根生若散

動行有起轉爲禪定行有支林功德生若愚癡行有起轉爲覺悟無常苦空行有故事慧分明助破理惑若有一蔽則不見理況復六耶今但破強者弱則隨去助道力深成辦一切功德調伏諸根滿足六度具佛威儀十力無畏乃至相好等如前說自思作之又佛威儀者佛坐道場轉法輪入涅槃皆約十二因緣小品云若能深觀十二因緣卽是坐道場道場有四若觀十二因緣生滅究竟卽三藏佛坐道場本樹草座若觀十二因緣卽空究竟通教佛坐道場七寶樹天衣座若觀十二因緣假名究竟別教舍那佛坐道場七寶座若觀十二因緣中究竟是圓教毗盧遮那



佛坐道場虛空爲座當知大小道場不出十二因緣  
觀也又諸佛皆於此觀而轉法輪若寂滅道場七處  
八會爲利根菩薩說十二因緣不生不滅亦名爲假  
名亦名中道義若鹿苑爲鈍根弟子說十二因緣生  
滅相若方等十二部經說十二因緣生滅卽空卽假  
卽中若摩訶般若說十二因緣卽空卽假卽中若法  
華說十二因緣卽中捨三方便也若涅槃說十二因  
緣具足四意皆有佛性如乳有醍醐性四教五味不  
同皆是約十二因緣善巧分別隨機示導耳又復置  
毒乳中是涅槃約十二因緣明不定教又復我說初  
成道十方菩薩已問此義卽涅槃中約十二因緣有

祕密教所以者何初爲鈍根弟子說十二因緣生滅相別有利根菩薩在座密聞十二因緣不生滅相卽悟佛性得無生忍此祕密意也此乃同居土中轉法輪相又諸佛皆於此觀而般涅槃若約鈍根無明滅乃至老死滅正習俱盡者是三藏佛有餘無餘涅槃約卽空觀無明滅乃至老死滅是通教佛有餘無餘涅槃約因緣假名中道觀無明滅乃至老死滅是別教佛常樂我淨涅槃約十二因緣三道卽三佛性亦三涅槃涅槃名諸佛法界是圓教遮那佛四德涅槃此是同居土示涅槃相有四種出像法決疑經方便實報二土成道轉法輪入涅槃亦應可解是名十二

因緣攝法義

云

識次位者三惡輕重皆由無明惡行

不善愛取所致也三善高卑亦由無明善行不動行  
愛取有所致也若翻無明愛取起生滅智者卽三藏  
中慧解脫賢聖位行高下也若轉行有起觀練薰修  
行行功德卽是三藏俱解脫賢聖位行高下也小大  
迦羅類此可知翻五度成於行有般若翻無明愛取  
調伏諸根卽有三僧祇位也若翻無明愛取體達卽  
真翻行有修六度如空種樹卽有四忍位行高下也  
翻無明愛取生道種智翻行有成歷劫修行諸度神  
通淨佛國土成就衆生卽有六輪位行高下若翻無  
明愛取卽是熾然三菩提燈者卽有圓教六卽位高

下十二因緣一人一念悉皆具足癡如虛空不可盡  
乃至老死如虛空不可盡空則無有盡與不盡空則  
是大乘十二門論云空名大乘普賢文殊大人所乘  
故名大乘大品云是乘不動不出若人欲使法性實  
際出者是乘亦不動不出大經云一切衆生卽是一  
乘如此等名理卽是由理卽是得有名字卽是從初  
發心聞說大乘知衆生卽是佛心謬取著故不能觀  
行如蟲食木偶得成字由名字故得有觀行如前所  
說七番觀法通達無礙卽是行處由觀行故得有相  
似發得初品止是圓信二品讀誦扶助信心三品說  
法亦助信心此三皆乘急戒緩四品少戒急五品事

理俱急進發諸三昧陀羅尼得六根清淨入鐵輪位  
也由相似故得有分證三道卽三德豁然開悟見三  
佛性住三涅槃入秘密藏清淨妙法身湛然應一切  
乃至等覺悉是分證卽轉無明生智慧明如初日月  
乃至十四日月轉行有生解脫如十六日月乃至二  
十九日月所有識名色法身漸漸顯現猶如月體由  
分證故得有究竟三德圓滿究竟般若妙極法身自  
在解脫過茶無字可說也故知小大次位皆約十法  
界十二因緣也若寂滅真如有何次位初地卽二地  
地從如生如無有生或從如滅如無有滅一切衆生  
卽大涅槃不可復滅有何次位高下大小耶不生不

生不可說有因緣故亦可得說十因緣法爲生作因  
如盡虛空方便種樹說一切位耳若人不知上諸次  
位謬生取著成增上慢卽菩薩旃陀羅安忍者觀十  
界因緣當起種種遮道法所謂三障四魔種種違順  
業魔禪二乘菩薩行行等法皆從行有兩支起若能  
安忍卽能成就如來行有功德所謂六根清淨之報  
相也煩惱障發者所謂貪瞋邪計深利諸見慢二乘  
通別三藏等菩薩慧行等悉是無明愛取支中發若  
能了達安忍則開佛知見報障發者所謂種種陰界  
入種種八風種種病患卽是七支中發若知卽是佛  
性不動轉取捨猶如虛空是則不斷生死而入涅槃

不破壞陰入而顯真實法身也能如是通達則於三障無礙住忍辱地柔和善順而不卒暴心亦不驚是名安忍心成如聲聞若住忍法終不退作五逆闡提菩薩住堪忍地終不起障道重罪也無順道法愛者一似二真菩薩從初伏忍入柔順忍發鐵輪似解功德不染三法所謂相似智慧功德法性以智慧有無明愛取故以功德有行有業故以法性有名色生死故皆不應著若於三法生愛不入菩薩位不墮二乘是名頂墮亦明順道觀無明愛取順慧行道觀行有順行行道觀識等順法性道順三道故不墮聲聞地愛三道故不入菩薩地云何起愛如入薜蘿林不梟

餘香菩薩唯愛諸佛功德不復念有二乘及餘方便  
道是名爲愛愛故不能變無明愛取爲真明不能變  
行有爲妙行不能顯識色爲法身三道不轉豈入菩  
薩位若不著相似三法無順道愛者則無量衆罪除  
清淨心常一如是尊妙人則能見般若般若尚不著  
何況於餘法入理般若名爲住卽是初發心住時便  
成正覺知一切法真實之性具足慧身不由他悟見  
般若者真見三道三種般若也從此已去心心寂滅  
自然流入薩婆若海無量無明自然而破大論云何  
故處處說破無明三昧荅無明品數甚多始從初心  
至金剛頂皆破無明悉顯法性餘一品在若除此品



卽名爲佛如來身者金剛之體衆惡已斷衆善善會  
三德究竟過茶無字可說是名乘是寶乘直至道場  
到薩婆若中住餘如上說云○第九明念佛發者或  
發念佛次發諸禪或因諸禪而發念佛於坐禪中忽  
然思惟諸佛功德無量無邊不可思議信敬慙愧深  
生慕仰存想諸佛有大神力有大智慧有大福德有  
大相好如是相好從此功德生如此相好從彼功德  
生如是相好有如此福德如此相好有如彼福德知  
相體知相果知相業一一法門照達明了深解相海  
而無疑滯定心帖帖亦不動亂安住此定漸漸轉深  
忽發麁細住欲界未到進入初禪等念佛根本各是

一邊覺此念佛境界故名覺支分別念佛有種種相  
種種功德法門皆分明識是爲觀支如是見已心大  
歡喜慶悅內充名喜支一心安隱徧體怡樂名樂支  
無緣無念湛湛深入名一心支如是五支與念佛法  
同起如來功德力熏味倍餘支不可稱說證者自知  
但佛法功德相好無量所發得三昧亦應無量所發  
五支亦復無量不可說不可說一一五支皆具十種  
功德眷屬支林是爲因念佛三昧發得初禪乃至四  
空特勝通明不淨背捨慈心等亦復如是云云何因  
禪發得念佛三昧行者若發根本等諸禪於定心中  
忽然憶念諸佛如來感動福德由於相好相好由於

善業三種法門與心相應豁豁明了此法發時禪定  
五支倍增其好四禪特勝背捨等亦如是此念佛定  
亦有二種亦隱沒二不隱沒若先得隱沒解佛功德  
意識明了然後得不隱沒明見光相瞻泰神容的的  
分明者此非是魔能增進功德扶疏善根因於念佛  
廣能通達六念法門所謂念佛功德法門卽是念法  
弟子受行念相業體果三事和合名念僧此卽以念  
僧以念佛以念法善奪諸惡念卽是念捨如是念時  
信敬慙愧卽是念戒念此定中交林功德與諸天等  
卽是念天三自念三念他乃至通達一切法於念佛  
門成摩訶衍如薩陀波喻見佛時得無量法門內外

皆不隱沒若內闇隱沒不識一箇功德法門而外見  
光相溢目者此是魔也折善芽莖損道花果今時人  
見佛心無法門皆非佛也若得此意但取法正色相  
非正也若專取色相者魔變作相泥木圖寫皆應是  
佛又如來示現自在無礙何必一向作丈光丈光形  
者不同端正人耳佛徧示所喜身徧示所宜身徧示  
對治身徧示不得度身師僧父母鹿馬猿猴一切色像  
隨得見時與法門俱發又能增長本之善根乃名念  
佛三昧云○十明神通發者略爲五天眼他心天耳  
宿命身通無漏屬下境中說唯得因禪發通不得因  
通發禪所以者何諸禪皆是定法互得相發諸禪是

通體通是諸禪用從體有用故通附體興用不孤生  
安能發體經云深修禪定得五神通卽此意也若通  
論發者一一禪中皆能發五通若就便易別論者根  
本多不能發設發亦不快利特勝通明多發輕舉身  
通背捨勝處多發如意轉變自在身通若慈心定中  
緣人色貌取得樂相因色知心識其苦樂此多發知  
他心通旣藉色知心亦知其言語音聲亦發天耳通  
因緣觀人三世照過去事多發宿命通照未來事多  
發天眼通若念佛定不隱沒者多發天眼通又諸通  
若精細者卽是三明但非無漏明耳譬如盲聾眼耳  
忽開則大歡喜況無量劫來五根內盲今破五翳淨

發五通一一通中皆有五支如眼障破覺於眼根與色作對卽覺支分別色等無量種相卽觀支此通開卽大慶悅是喜支內心受樂卽樂支無緣無念湛然卽一心支餘四通亦如是若就諸禪之體或內心得解或外相不明而有隱沒之義神通是定家之用用必明了是故悉是不隱沒也○第四明修止觀者若行人發得諸禪無有方便貪著禪味是菩薩縛隨禪受生流轉生死若求出要應當觀察十意云若觀禪如胡瓜能爲十法界而作因緣初雖發定柔伏身口如蛇入筒因禪而直後出觀對境已復還曲更生煩惱初如小水後盈大器禪法旣失破成反道造無間

業佛在世時得四禪比丘謂爲四果又熊子等是也

云又勝意著禪自高謗擯喜根

云

又入定無惡出觀

起惡成業若失定者惡牽惡道不失定者受禪報盡  
惡業則興受飛狸身噉諸魚鳥卽其義也若不得禪  
名利不至旣得禪已因造三途法界若在禪中染著  
定相若出觀已起慈仁禮義之心若不失定隨禪報  
盡則生人道若用禪觀熏於十善任運自成不加防  
護是天業四禪四空上兩界業若專修根本但增長  
人天永無出期如大通智勝佛時諸梵自云一百八  
十劫空過無有佛三惡道充滿了無一人得出生死  
若專修不淨背捨等不俟諦智能發無漏成聲聞法

界若觀諸禪能破六蔽蔽是集集招苦果能破是道  
道能至滅亦是聲聞法界亦是六度菩薩法界又禪  
必棄欲是爲檀若不持界三昧不現前是爲尸得禪  
故無瞋是爲忍得禪故無雜念是爲精進此法自名  
禪知諸法皆無常名爲智是名因禪起六度菩薩法  
界又觀此禪是因緣生法若觀諸禪是有支有支由  
取乃至老死如前說是緣覺法界又觀諸禪因緣生  
法卽空生法卽空是無生道諦是通教聲聞菩薩等  
法界又觀此禪因緣生法卽空卽假卽中卽法界從  
禪而生從禪而滅何以故若因禪出生三途六道法  
卽是增長二十五有生六法界滅四法界若因禪出



生背捨等法伏二十五有亦是摧翳六法界也若觀  
背捨等無常者是用生滅拙度破二十五有滅六法  
界生一法界若觀禪因緣生法卽空者是用不生巧  
度破二十五有滅七法界生一法界若觀禪卽假者  
是用無量拙度破二十五有及客塵煩惱滅八法界  
生一法界若觀禪因緣生法卽中者是用一實巧度  
破二十五有及無明惑滅九法界生一法界成王三  
昧徧攝一切三昧根本背捨悉入其中如流歸海變  
根本背捨悉成摩訶衍攝義如流入海滅義如淡盡  
生義如鹹成禪波羅蜜變彼慈定成無緣慈悲變彼  
念佛成大念佛海十方諸佛悉現在前變彼神通成

於如來無謀善權舉要言之九法界中諸戒定慧入  
王三昧者變名聖行聖行所契安住諦理卽名天行  
天行有同體無緣慈卽梵行單明悲同煩惱欲拔苦  
卽病行單明慈同小善欲與其樂卽嬰兒行以是五  
行生十功德乃至究竟成大涅槃是名因禪生滅十  
法隱顯三諦次第生出展轉增進攝成佛法具在卽  
中王三昧內此乃思議之境非今所觀不思議觀者  
若發一念定心或味或淨乃至神通卽知此心是無  
明法性法界十界百法無量定亂一念具足何以故  
由迷法性故有一切散亂惡法由解法性故有一切  
定法定散旣卽無明無明亦卽法性迷解定散其性

不二微妙難思絕言語道情想圖度徒自疲勞豈是  
凡夫二乘境界雖超越常情而不離羣有經言一切  
衆生卽滅盡定雖卽心名定而衆生未始是而衆生  
未始非何以故若離衆生何處求定故衆生未始非  
若卽衆生定非衆生故衆生未始是未是故不卽不  
非故不離不卽不離妙在其中難量若空唯佛與佛  
乃能究盡一念禪定旣爾一切境界亦復如是若如  
此觀豁得悟者直聞是言煩惱病愈不須下九法也  
若觀未悟重起慈悲此理寂靜而衆生起迷無明戲  
論翳如來藏稠煩惱林是故起悲拔根本重苦又無  
明卽法性煩惱卽菩提欲令衆生卽事而真法身顯

現是故起慈與究竟樂如是誓願清淨真正上求佛  
道下化衆生不雜毒不偏邪無依倚離二邊名發苦  
提心此心發時豁然得悟如快馬見鞭影即到莊路  
若不去者當安心止觀善巧迴轉方便修習或坐或  
觀若觀一念禪定二邊寂滅名體真止照法性淨無  
億無礙名卽空觀又觀禪心卽空卽假雙照二諦而  
不動真際名隨緣止通達藥病稱適當會名卽假觀  
又深觀禪心禪心卽空卽假卽中無二無別名無分  
別止達於實相如來藏第一義諦無二無別名卽中  
觀三止三觀在一念心不前不後非一非異爲破二  
邊名一名中爲破偏著生滅名圓寂滅爲破次第三

止三觀名三觀一心實無中圓一心定無以此止觀而安其心云若二法研心而不入者當知未發真前皆是迷亂以一心三觀徧破橫豎一切迷亂迷去慧發亂悉定成如其不悟卽塞而不通應當更觀何者不通何者不塞若其不塞卽應是通如其不通更須觀察知字非字識四諦得失若不悟者是不解調停道品所以者何一念禪心具十界五陰諸陰卽空破界內四倒成四枯諸陰卽假破界外四倒成四榮諸陰卽中非內非外非榮非枯於其中間而般涅槃如此四念開道品門道品開三解脫門入涅槃道定具足何意不悟當由過去障蔽現著禪味不能棄捨今

昔相扶共成慳蔽道何由發當苦到懺悔捨身命財  
捨味禪貪修於檀度助治慳障又味著諸禪卽破隨  
道戒乃至破具足戒過現相扶共成破戒蔽應苦到  
懺悔令事相謹絜助治尸障也又如黑齒梵天尚自  
有瞋今發事禪何意無瞋又諸有禪定有非無生亦  
非寂滅非二忍故任自是瞋過現相扶共成瞋障當  
苦到懺悔加修事慈助治忍障又著禪味是放逸癡  
所盲散動間雜過現相扶共成懈怠當苦到精進無  
間相續助治進障又禪中所發業相惱亂禪心不得  
湛一若二乘但斷煩惱抵業而去不論斷業菩薩斷  
煩惱受法性身而諸法門有開不開當知爲業所障

須苦到修諸善業法性身尚爾況生死身安得無業  
修善助治定障又味禪者全是不了無常生滅況了  
味著不生不滅過現相扶共成癡障當苦到懺悔治  
事迷僻是略明對治廣不可盡行人觀法極至於此  
若不悟者是大鈍根大遮障罪恐因罪障更造過失  
故重明下三種意耳識次位內防增上慢安忍外防  
八風除法愛防頂墮十法成就速入無生得一大車  
遊於四方直至妙覺破二十五有證王三昧自行化  
他初後具足餘皆如上說

云云

摩訶止觀卷第九下

摩訶止觀卷第十

天台智者大師說

○第七觀諸見境者非一曰諸邪解稱見又解知是見義推理不當而偏見分明作波定解名之爲見夫聽學人誦得名相齊丈作解心眼不開全無理觀據文者生無證者死夫習禪人唯尚理觀觸處心融闇於名相一句不識誦文者守株情通者妙悟兩家互闕論評皆失若見解無滯名字又諳以見解問他意無窮盡如曲射繞鳥飛走失路若解釋難問綽有餘工如射太虛箭去無礙當知非由學成必是見發此見或因禪發或因聞發例如無漏起時藉於信法聞



思因聞發者本聽不多廣能轉悟見解分明聰辯問  
答因禪發者初因心靜後觀轉明翻轉自在有如妙  
達南方習禪者寡發見入微北方多有此事盲瞶不  
識謂得真道謂得陀羅尼聞於知人高安地位或時  
不信撥是狂惑今言非狂非聖夫鬼著能語鬼去則  
癡其既不爾故知非狂尋其故惑貪瞋尚在約其新  
惑更增煩惱八十八使繫縛浩然故知非聖乃是見  
慧發耳通論見發因聞因禪而多因禪或禪已見發  
或禪見俱發見已得禪又少兩義則多例如諸禪通  
發無漏而未到發者少六地九地發者多爲是義故  
次禪定境而論諸見也若人見發利智根熟能自裁

正或尋經論勘知已過者此人難得若不能自正遇  
善知識明示是非破其見心此亦難得故云真法及  
說者聽衆難得故旣不自覺又不值師邪晝日增生  
死月甚如稠林曳曲木何得出期今觀諸見境爲四  
一明諸見人法二明諸見發因緣三明過失四明止  
觀第一明諸見人法又二一邪人不同二邪人執法  
不同邪人不同又爲三一佛法外外道二附佛法外  
道三學佛法成外道一外外道本源有三一迦毗羅  
外道此翻黃頭計因中有果二漚樓僧佉此翻休睺  
計因中無果三勒沙婆此翻苦行計因中亦有果亦  
無果又入大乘論云迦毗羅所說有計一過作者與

作一相與相者一分與有分一如是等名爲計一優  
樓僧佉計異迦羅鳩馱計一異若提子計非一非異  
一切外道及摩迦羅等計異皆不離此四從三四外  
道派出枝流至佛出時有六大師所謂富蘭那迦葉  
迦葉姓也計不生不滅末伽梨拘賒黎子計衆生苦  
樂無有因緣自然而爾刪闍夜毗羅胝子計衆生時  
熟得道八萬劫到縷丸數極阿耆多翅舍欽婆羅欽  
婆羅麗衣也計罪報之苦以投巖拔髮代之迦羅鳩  
馱迦旃延計亦有亦無尼犍陀若提子計業所作定  
不可改此出羅什疏名與太經同所計三同三異或  
翻誤或別有意今所未詳而太體祖承迦毗羅等依

本爲三或可爲四謂四見也二附佛法外道者起自  
犢子方廣自以聰明讀佛經書而生一見附佛法起  
故得此名犢子讀舍利弗毗曇自制別義言我在四  
句外第五不可說藏中云何四句外道計色卽是我  
離色有我色中有我我中有色四陰亦如是合二十  
身見大論云破二十身見成須陀洹卽此義也今犢  
子計我異於六師復非佛法諸論皆推不受便是附  
佛法邪人法也或云三世及無爲法爲四句也又方  
廣道人自以聰明讀佛十喻自作義云不生不滅如  
幻如化空幻爲宗龍樹斥云非佛法方廣所作亦是  
邪人法也三學佛法成外道執佛教門而生煩惱不

得入理大論云若不得般若方便入阿毗曇卽墮有中入空卽墮無中入毘勒墮亦有亦無中中論云執非有非無名愚癡論倒執正法還成邪人法也若學摩訶衍四門卽失般若意爲邪火所燒還成邪人法故百論正破外外道今大乘論師炎破毗曇成實謂是計有無外道然成論云三藏中實義空是此乃似無意又同百家之是異百家之非捉義出沒又似因中亦有果亦無果意又似毘勒意當時論起人皆得道今時執者乃是人失何關法非此應從容不可雷同迦毗羅等若以大破小如淨名所斥取其不見中理與外道同非是奪其方便之意二明邪人執法不

同者關中疏云一師各有三種法一得一切智法二得神通法三得韋陀法一切智者各於所計生一種見解心明利將此見智通一切法故明一切智外道神通法者發得五通變城爲鹵轉釋爲羊停河在耳捫摸日月此名神通外道韋陀法者世間文字星醫兵貨悉能解知是爲韋陀外道一師則有三種得法不同也犢子方廣亦如是若望執佛法邪約三藏四門一門有三一直發理解智性生見二得諸神通三解四阿含文字如是四門則有十二種得法不同也若得意者一一門中初有三種念處一性念處二共念處三緣念處性是直緣諦理共是事理合修緣是

徧緣一切境法亦是緣三藏教法後證果時成三種  
解脫慧解脫俱解脫無疑解脫故結集法藏時選取  
千人悉用無疑解脫徧解內外經書擬降外敵毗曇  
婆沙云煩惱障解脫禪定障解脫一切法障解脫慧  
解脫人得初解脫共解脫人得第二解脫唯佛得第  
三解脫總名無疑解脫也執摩訶衍通別圓四門失  
意者例有三十六種得法不同○第二明諸見發有  
二一明諸見發二見發不同一明見發者或因禪或  
因聞衆生久劫靡所不作增習諸見隔生中忘罪覆  
本解心不速開今障若薄能發諸禪或禪見俱發或  
禪後見發或聞他說豁然見生如有泉水土石所礙

決卻壅滯濬矣成川闡障既除分別遠去一日十日  
縣縣不已番番自難番番自解所執之處實而有通  
所不執處虛而自破又辯才無滯巧說已法莊嚴言  
辭他來擊難妙能申釋如是見慧從何處出由禪中  
有觀支觀支是慧數逸觀諸法莫自知止快馬著汗  
不可控制若聽講人無禪潤見始欲分別多抽腸吐  
血因是致命見終不成若定力潤觀雖逸難制不致  
抽腸多得成見從此觀支推研道理謂諸法因中有  
果此解明利洞見遠意出過餘人將此難他他不得  
解謂他妄語自執已義他不能壞自謂是實無生真  
智得理妙心若細推尋但是見惑世智辯聰具足八



十八使顛倒惑網豈關真解當知是迦毗羅見發相也又約觀支推尋諸法因中無果此見分明解心猛利雖種種難能種種通引種種證成因中無果義以此破他他不能當餘爲妄語他來破已已執轉成以此爲實建言歸趣唯向因中無果當知定是僧佉見發也若於觀支思惟因中亦有果亦無果法大論云有與無諍無與有諍言長爪執亦有亦無與有無者諍若入此見難問無窮盡豈非勒沙婆見發也其六師所計不同須善得諸師執意以所發見勘之雖小不同但體大體相似卽是六師見發也若於觀支計必有我而不在身見四句中亦不在三世無爲四句

中而在第五不可說藏中發此見時心解明利能問  
能答神儒快捷難與當鋒破他成已決不可移當知  
是犢子見發也若於觀支謂諸法幻化起空盡相此  
解虛無不見解心及諸法異同如幻化唯計此是餘  
悉妄語此是方廣見發也若於觀支推諸法無常生  
滅不住人我如龜毛兔角不可得但有實法析實法  
塵若麤若細總而觀之無常無我計此爲實所發見  
解全謂毗曇諸舊聽人雖解名相心路不通若發此  
見於文雖昧而神解百倍其不識者謂是賢聖而實  
非也若是賢人道心鬱然與解俱生能伏煩惱成方  
便位今雖解無常增長諍競道心沈沒煩惱轉熾故

知是有門見發也若於觀支忽發空解謂言無常生滅三假浮虛析塵入空種種方便此見明利神用駿疾強於問難破他成已是實餘妄此是空門見發也若於觀支計一切法亦有亦無若入此門難問無窮盡此是昆勒意論乃不度習發無定是爲亦有亦無見發也非有非無見例亦可知當知四門通理則成正見若失方便墮四見中故名佛法內邪也何但三藏四門執成邪見無量劫來亦學摩訶衍通別圓等不入理保之爲是取於四邊邪見火燒今於觀支忽發先解夢虛空花如幻之有作此有解解心明利或作幻本無實無實故空空解明利或作亦空亦有解

譬如幻化物見而不可見或作非空非有解非是幻  
有亦非幻無中論觀法品云若言諸法非有非無是  
名愚癡論向道人聞說卽悟名得實相邪心取著生  
戲論者卽判屬愚癡論是爲通教四門四見也若於  
觀支思惟通教四門之解是界內幻夢此夢從眠法  
生眠卽無明觀無明入法性亦有四門或言法性如  
井中七寶或言如虛空或言如酒酪餅或言中道此  
四解明利卽是別教四門見發也若於觀支忽解無  
明轉卽變爲明明具一切法或謂無明不可得變爲  
明明何可得此不可得具一切法或謂法性之明亦  
可得亦不可得非可得非不可得一門卽三門三門

卽一門此解明利所破無不壞所存無不立無能逾  
勝亦復自謂是無生忍如此解者是圓教四門見發  
也大乘四門皆成見者實語是虛語生語見故涅槃  
是生死貪著生故多服甘露傷命早夭失方便門墮  
於邪執故稱內邪見也夫四見爲諸見本自他復爲  
共無因本故龍樹破自他竟點共有二過無因則不  
可自他既不實况無因耶本破末傾其意在此若立  
自他共無因例立今大小乘四門僻執成見但明自  
他意竟餘者可知若三藏明大生生小生皆從無明  
生不由真起若無明滅諸行滅不關真滅執此見者  
卽成自性邪見也通教明真是不生不生故生生一

切惑若滅此惑還由不生如此執者是他性邪見也  
界內以惑爲自真爲他故作此說也界外以法性爲  
自無明爲他別教計阿梨耶生一切惑緣修智慧滅  
此無明能生能滅不關法性此執他性生邪見也圓  
教論法性生一切法法性滅一切法此則計自性邪  
見前君弱臣強今君強臣弱餘二可知夫因聞發  
理見少發神通韋陀因禪多發神通韋陀少發理見  
發理見者伏學人發神通伏俗人俗人取異不取解  
學人取解不取異發韋陀兼伏具發三者最能兼伏  
因禪發者已如上說因聞發者今當說行者雖得禪  
而未發見要假前人啓發其心心旣靜利忽聞因中

有果心豁開悟洞明邪慧百千重意逾深逾遠猶如  
石泉是爲從聞發得迦毗羅見餘三亦如是若聞第  
五不可說藏及聞幻化卽發憤予見也或聞三藏四  
門隨解一句見心豁起深解無常觀心奔涌不復可  
制是爲因聞發有門見三門亦如是若聞摩訶衍十  
二門各依門生解解心明利過向所聞雖發此解非  
大方便不入小賢中又非迦毗羅等邪解故知是發  
十二門見二明發法不同者迦毗羅外道直發見解  
解心雄猛邪慧超殊不可摧伏是得一切智法也若  
直發神通蹈履水火隱顯自任誰不謂聖人乎真諦  
三藏云振旦國有二種福云是得神通法也若直發

韋陀知世文字覽諸典籍一見卽解或竊讀三藏衍  
等經結眼便識還將此知莊嚴已法若爾內外相濫  
殆不可識今時多有還俗之者畏憚王役入外道中  
偷佛法義竊解莊老遂成混雜迷惑初心孰正孰邪  
是爲發得韋陀法也一種外道各得三法約人成七  
所謂單三複三具足者一餘二外道亦爾合有二十  
一種得法不同若約六師一師有三合成十八約人  
得多少則有四十二種得法不同也犢子方廣發法  
不同亦有單三複三具足者一若內邪得法不同隨  
一一門所計道理精能分別此是得性念處見亦是  
慧解脫耶餘門亦如是若但著象發得神通飛騰縱



任此是得共念處見亦是俱解脫耶若通慧自在而不能說法或尋經論或聽他說卽達名數又下通韋陀上通大乘悉用已見消諸法門以諸法門莊嚴已見四門各有三種約人亦有七意也若通別圓等四門各直發慧解各但變通各知內外經書者自謂道真他謂高著今但謂是邪見一門有七合成八十四種云復次前總論同異今當一一論同異三外六師雖同發一切智或有見一切智或無見一切智如是等種種一切智所計處別故見智則異各據爲是餘人則非法華云野干前死此明利使發時鈍使則沒故言前死又云諸大惡獸競來食噉卽是所執一見

能噉諸見論力云一切諸師皆有究竟道鹿頭第一  
當知一切智各各不同也乃至三藏四門一切智大  
乘四門一切智各執所見互相吞噉彼彼不同可以  
意得次神通法不同者神通因禪而得禪不定外  
外道祇因根本發通或初二三四所因既殊力用亦  
別內邪亦因根本又因淨禪所因淺深通用優劣大  
論云所因處用通廣所不因處用通劣但禪是事通  
是用俱屬福德莊嚴非所諍處雖無理諍校誦所因  
通用悉異次韋陀不同者若外外道所發所讀治家  
濟世之書部帙不同詮述各異發讀多則知廣少則  
知狹長慢自大皆由文字不同也若內邪不發不讀

外外道文字者則知狹發讀則知廣不發不讀三藏  
文字者不知界內名相則知見狹發讀者則知廣不  
發不讀衍者不知界外名相則知狹發讀者則知廣  
當知韋陀之法句句不同耳復次結會不同然內外  
諸邪俱明理慧神通文字立德調心尊人卑已聲譽  
動物如菴羅果生熟難知天下好首莫測邪正今判  
之甚易如迦羅七種不同研其根本皆從邪無中起  
若計因中有果破一切法唯存此句作諸神通搖動  
時俗令人信受因中有果法所引韋陀異家名相莊  
嚴因中有果所立諸行歸宗趣向指極因中有果爲  
所執法動身口意造無量罪如後說由此驗知是迦

毗羅外道也。僧佉沙婆例亦如此。元起邪無終歸所  
執。犢子亦如是。小大四門準此可解。驗之以元始察  
之以歸宗。則涇渭分流。菽麥殊類。何意濫以莊老齊  
於佛法邪。正旣以混和。何能拔大異小。自行不明。何  
得化他。師弟俱墮也。第三明過失爲二。一明過失。二  
明並決。一正明過失者。若天竺宗三真丹亦有其義。  
周弘政釋三玄云。易判八卦陰陽吉凶。此約有明玄。  
老子虛融此約。無明玄。莊子自然約。有無明玄。自外  
枝派源祖出此。今且約此以明得失。如莊子云。貴賤  
苦樂是非得失。皆其自然。若言自然是不破果。不辯  
先業。卽是破因。禮制仁義衛身安國。若不行用滅族。

言家但現世立德不言招後世報是爲破果不破因  
若言慶流後世并前則是亦有果亦無果也約一計  
卽有三行一謂計有行善二計有行惡三計有行無  
記如云理分應爾富貴不可企求貧賤不可怨避生  
無足欣死何勞畏將此虛心令居貴莫憍處窮不悶  
貪患心息安一懷抱以自然訓物作入理弄引此其  
得也得有多種若言常無欲觀其妙無何等欲忽玉  
璧棄公相洗耳還牛自守高志此乃棄欲界之欲攀  
上勝出之妙卽以初禪等爲妙何以得知莊公皇帝  
問道觀神氣見身內衆物以此爲道似如通明觀中  
發得初禪之妙若言諸苦所因貪欲爲本若離貪欲

卽得涅槃此無三界之欲此得滅止妙離之妙又法  
名無染若染於法是染涅槃無此染欲得一道微妙  
妙此諸欲欲妙皆無汝得何等尚不識欲界欲初禪  
妙况後欲妙耶若與權論乃是逗機漸引覆相論欲  
妙不得彰言了義而說但息跨企之欲觀自然之妙  
險誠之行旣除仁讓之風斯在此皆計有自然而行  
善也又計自然任運恣氣亦不運御從善亦不動役  
作惡若傷神和不會自然雖無取捨而是行無記行  
業未盡受報何疑若計自然作惡者謂萬物自然恣  
意造惡終歸自然斯乃背無欲而恣欲違於妙而就  
麤如莊周斥仁義雖防小盜不意大盜揭仁義以謀

其國本以自然息欲乃揭自然而爲惡此義可知也  
次約天竺諸見空見最強今寄之以論得失夫空見  
爲三一破因不破果破果不破因二因果俱破不破  
一切法三破因果及一切法一切法卽三無爲也第  
三外道與佛法何異大論明大小乘空體析爲異外  
道亦體析此云何異外道從邪因緣無因緣若析若  
體若畢竟空佛弟子知從愛因緣若析若體若畢竟  
空有人言破語非體今明中論首尾以破題品破豈  
異體邪故不約此分邪正大小但依大論析正因緣  
異外道體正因緣異小乘若約邪因緣起空見亦在  
三行而多作惡真觀空人知從愛生善尚不作豈

惡乎起空見人於果報財位非其諍處空是其處同  
我空法親友生愛讚有破空怨讎瞋惱人不知空慢  
之如土空心無畏不存規矩恣情縱欲破正見威儀  
淨命死皆當墮三惡道中六師云若有慙愧則墮地  
獄若無慙愧不墮地獄背鱸經屏天雷屎并逆父慢  
母劇於行路乃會無礙若親異疏非平等也自行姦  
惡復以化人普共爲非失禮如畜豈有天下容忍此  
耶雖謂無礙不敢逆主慢后自惜其身則於身有礙  
是人直發此見見轉熾盛永不得禪若得禪已見禪  
法多失發見已禪多是鬼禪鬼通能記吉凶又知他  
心又廣尋韋陀證成此見令人信受破世出世善名



噉人狗若一種不破不名飽足破一切法見心乃飽  
飽名轉熾內無實行但虛譚計如叫喚求食執空與  
有譚空有相破爲噉喋自稱譽爲嗥吠破他名戲立  
已名掣又狐疑未決爲噉喋陵恐於他爲嗥吠如守  
家狗令他畏故而吠也此人純自行惡化他有四一  
自爲惡勸人行善二自揚行善勸人行惡三自勸俱  
惡四自勸俱善自惡勸善者言我能達理於惡無妨  
汝是淺行須先習善化道應先以善引之若自善勸  
惡者言我是化主和光須善汝是自行正應作惡自  
勸俱惡者俱行實道故自勸俱善者俱行權道故此  
四雖異皆以惡爲本隨業沈淪何道可從耶又空見

行善者空無善惡而須行善不行善者毗紐天瞋衆  
生苦惱苦惱故成業業由過去現在受報以現持戒  
苦行遮現惡果則得漏盡若爾須善故持戒節身少  
欲知足麤衣噉草爲空造行而生喜怒空是瞋愛諍  
計之處若得禪發見禪謝見熾見已得禪乃是鬼禪  
鬼通如此空見自行唯一化他有四例前自行化他  
卽是隨業隨業升沈何關道也次執空見不作善惡  
騰騰平住雖謂平住稱愛毀憂以平平自高當知平  
平生煩惱處得禪發見如前亦通韋陀竊解佛教莊  
嚴無記囉喋叫喚無量結使從無記生自行唯一化  
他亦四若不發禪業牽惡道若發禪隨禪受生若此

業未熟先世諸業強者先牽當知諸見未能伏惑云  
何惑斷耶亦有亦無等得失之相準此可知次明內  
邪得失者三藏四門本爲入理而執成戲論發見獲  
禪兼通經籍若以此門自執祇應生善饒與見相應  
還起三行其行善者專爲諸有而造果報取著有門  
而生愛恚勝者墮慢坑負者墮憂獄生煩惱處有門  
還閉不得解脫行惡行者執有爲是餘者皆非爲此  
有門無惡不作邪鬼入心唯長衆非九十六道三順  
佛法故有阿毗曇道修多羅道但五部羅漢於此有  
門得出豈應是邪今人僻取鬼則入心故稱阿毗曇  
鬼或從見入或從禪入自行有一化人亦四一門旣

爾三門亦然若通別圓等各有四門生見一見亦具三行行善者可知行惡者執大乘中貪欲卽是道三毒中具一切佛法如此實語本滅煩惱而僻取著還生結業稱毀憂愛欺慢嗟喋競於名利自行則一化他有四旣非無漏無明潤業業力牽生何所不至不能細說準前可知如是等見違於聖道又能生長種種罪過其不識者執謂是道設知是見隨見而行以自埋沒豈能於見動不動而修道品略言見發生諸過失也二明並決真僞者一就所起發並決二就所依法並決今通從外外道四句乃至圓四門外道見通韋陀乃至圓門三念處三解脫名數是同所起見

罪繫縛無異辟如金鐵二鎖又從外道四句乃至圓  
門四見名雖清美所起煩惱體是汙穢辟如玉鼠二  
璞又從外道四句乃至圓門四見雖同研鍊有成不  
成辟如牛驢二乳又從外道四見乃至圓門四見有  
害不害辟如迦羅鎖頭二果所計神我乃是縛法非  
自在我各執已是餘爲妄語互相是非何關如實自  
謂真道翻開有路望得涅槃方沈生死自言諦當終  
成邪僻愛處生愛瞋處生瞋雖起慈悲愛見悲耳雖  
安塗割乃生滅強忍雖一切智世情推度雖得神通  
根本變化有漏變化所讀韋陀世智所說非陀羅尼  
力非法界流雖斷鈍使如步屈蟲世醫所治差已更

發八十八使集海浩然三界生死苦輪無際地著有  
漏永無出期皆是諸見幻偽豈可爲真實之道也二  
約所依法異者一切諸見各依其法三外外道是有  
漏人發有漏法以有漏心著於著法著法著心體是  
諍競非但因時捉頭拔髮發諸見已謂是涅槃執成  
見猛毒增闢盛所依之法非真所發之見亦是偽也  
此雖邪法若密得意以邪相入正相如花飛葉動籍  
少因緣尚證支佛何況世間舊法然支佛雖正花葉  
終非正教外外道密悟而其法門但通諸見非正法  
也昔由著心著於著法因果俱闕斷真是邪法生邪  
見也辯三藏四門是出世聖人得出世法體是清淨

滅煩惱處非唯佛經是正法五百所申亦能得道妙  
勝定云佛去世後一百年十萬人出家九萬人得道  
二百年時十萬人出家一萬人得道當知以無著心  
不著無著法發心真正覺悟無常念念生滅朝不保  
夕志求出要不得封門生染而起戲論辟如有欲速  
見王受賜拜職從四門入何暇盤停諍計好醜知門  
是通途不須諍計如藥爲治病不應分別速出火宅  
盡諸苦際真明發時證究竟道畢竟無諍無諍則無  
業無業則無生見但有道滅心地坦然因果俱無關  
諍俱滅唯有正見無邪見也復次四門雖是正法若  
以著心著此四門則生邪見見四門異於修因時多

起鬪諍辭如有人久住城門分別瓦木評薄精麁謂南是北非東巧西拙自作稽留不肯前進非門過也著者亦爾分別名相廣知煩惱多誦道品要名聚衆媒術求達打自大鼓豎我慢幢誇耀於他互生鬪諍捉頭拔髮八十八使瞋愛浩然皆由著心於正法門而生邪見所起煩惱與外外道更無有異論所計法天懸地殊方等云種種問橋智者所可人亦如是爲學道故修此四門三十餘年分別一門尚未明了功夫纔著年已老矣無三種味空生空死唐棄一期如彼問橋有何利益此由著心著無著法而起邪見也次通教四門體是正法近通化城前曲此直巧拙雖



殊通處無別如天門直華餘門曲陋不住二門俱得  
通進若數瓦木二俱遲墮若不稽滯法門若因若果  
俱無諍著是名無著心不著無著法不生邪見也復  
次若以著心著此直門亦生邪見或爲名爲衆爲勝  
爲利分別門相瞋愛慢結因此得生僻如以毒內良  
藥中安得不死以見著毒入正法中增長苦集非如  
來咎利根外道以邪相入正相令著無著成佛弟子  
鈍根內道以正相入邪令無著有著成邪弟子豈不  
悲哉別圓四門巧拙利鈍俱通究竟涅槃因不住著  
果無闢諍若封門起見則生煩惱與漚樓佉等以此  
而觀如明眼人臨於涇渭豈容迷名而不識清濁也

略明見發則有五番一番有四則有二十門一門有七合一百四十見法不同廣論無量皆藉因緣而得開發良以通修止故諸禪得發通修觀故諸見得發通修之緣乃由止觀而根本別因必由前世或在外道中學或爲佛弟子大小乘中學或因聞法相曾發諸見或因坐禪發此諸見隔生廢忘解不現前今修靜心或聞經論熏其宿業見法還顯先世熟者今則易發先世生澀今則難發隔生遠前難近則易若外外見熟近則前發內見熟近則施現神通韋陀既是事相隔生易忘難發見是慧性難忘易發如人久別憶名忘面事理難易亦復如是據前世外有鬼緣

鬼則加之發鬼禪見外有聖緣聖人加之發正禪  
見也復次若徒未識諸見通患於見生怖急急斷  
今識其邪相慎莫卒斷但盡其成就作助道者必有  
巨益如腹有蠱當養寸白使鴻幹珠璣以然者世間  
癡人頑同牛馬徒雷震法音溢敷銀鑪於其間見無  
益耽著五欲如患蠱者藉藥諸見羈繫鈍使喻之寸  
白見慧與正觀相鄰聞法易悟如鍊珠湯爲是義故  
須養見研心前驅開導若入二乘則動見修道品若  
入大乘不動見修道品對寇破賊然鍊動成是爲養  
外見以爲侍者若發三藏拙四門見通巧四門見見  
雖是障助道亦深若福慧法升天甚易取道則難見

是慧性沈淪亦易悟道甚疾大論云三惡亦有得道人少故不說白人黑壓不名黑人耳既知是見惑不得起恣其分別如諸外道先有見心被佛化時如快馬見鞭影即便得悟若無見者萬斧不斷如爲牛馬說法不相領解獾獠全未解語若爲論云故佛於其人則不出世分形散質爲師爲友導其見法佛曰初出權者引實聞法卽悟法華云密遣二人者約法論方便之二教約人是權同二乘衆聖屈曲尚教其見今得見發豈可遽除若先世修別圓八門未斷通惑此見若發過同三外若先世已破通惑未悟別理或同二乘前見尚養況此見耶淨名取二乘過邊撥屬

外道又取助邊使之爲侍進退解之勿一向也余生  
修道見心發者真理可期見若未發聖境難會第四  
約見修止觀者如上通論得見不同則一百四十種  
若別就內邪則有一百一十二種若作宗明義凡有  
幾宗十地中攝數論等分別見相爲同爲異邪正途  
轍優降幾何若解此意知不相關其不解者知復奈  
何夫佛法兩說一攝二折如安樂行不稱長短是攝  
義大經執持刀仗乃至斬首是折義雖與奪殊途俱  
令利益若諸見流轉須斷令盡若助練神明迴心入  
正皆可攝受約多種人說上諸見無有一人併發之  
者設使皆發會相吞噉唯一事實約一一見各作法

門巧不言方經九十日束一一見同一觀門具一切法亦不可盡多一自在今且約一見衆多亦然諸見之中空能壞一切一切不能壞空引人甚利今當先觀空見例爲十意思議境者空見出生十法界法胡瓜非熱能爲病因空非十界能作因緣成論云剎那邊見心起卽是不善毗曇明剎那見心起不當邊善惡名爲無記因等起心一切善惡因之而起今此空見亦有二義若別觀者如因等起十法界因之而生所以者何昔未空見未曾爲行今發空見卽有三行如前說由空造惡者行無礙法上不見經佛教田可尊下不見親恩之德習裸畜法斷滅世間出世等善

闡提雖惡尚存憐愛之善空見永無純三品惡運害  
傷毀卽地獄界無慙無愧卽畜生界慳貪破齋不淨  
自活卽餓鬼界破齋故常飢不淨故噉穢因空行善  
者持戒苦行莊嚴十善三業淳熟卽三善道界又發  
根本卽色界又因空生聲聞者若謂空者其實不識  
空中四諦所以者何若證法性是空是淨虛妄空見  
必依果報果報是汙穢色大品云色若常無常等皆  
依於色受納空是餘者則非取空像貌異於有法緣  
空起三行分別空心勝於餘法是名五陰空塵對意  
卽是二入更加意識卽是三界界入陰等卽是苦諦  
空見是瞋處愛處慢處有見弱者則墮破有法掣理

就空疑不得起若槓不破掣不來則囉喋生疑又今  
雖無疑後當大疑何以故若空是理應與聖等既不  
等者安得不疑是誰計空計空者我我實非空空亦  
非我因空生我謂我行我解讚我毀我著此空邊不  
可捨離謂因空道望通涅槃則以空爲戒非雞狗等  
非因計因是因盜戒取計空爲空實非理空非果計  
果是果盜見取空見偏僻卽是邪見如是十使從空  
而生欲苦下具十集下有七除身邊戒取道下有八  
除身邊滅下有七除身邊戒取合三十二色無色各  
除四瞋各二十八合八十八使是名集諦集迷苦起  
苦由集生苦集流轉長爪不識復有一鬼頭上火然



非想已來尚自未免何得於空不識苦集若識空見  
苦集苦集皆依於色一切色法名身身色汙穢汙穢  
是不淨智者所惡破於淨倒名身念處若受空見是  
受不受受第二句順空卽樂受違空卽苦受不違不  
順卽不苦不樂受三受卽三苦計苦爲樂是名顛倒  
若知無樂破樂顛倒名受念處空塵對心而生意識  
此心生滅新新流動有緣思生無緣思不生生滅無  
常而謂是常卽是顛倒識識無常卽破常倒名心念  
處取空像貌而行善惡行中計我行若是我行有好  
惡行有興廢我亦應爾諸行無量我若徧者我則無  
量若不徧者則一行無我衆行亦無我強計有我卽

是顛倒若知無我則破想行名法念處但諸陰通計  
四倒於想行計我強於色計淨強於心計常強於受  
計樂強名別念處若總念處則不爾也是爲空見生  
念處觀勤破倒觀卽是正勤定心中修名如意足五  
善根生名爲根破五惑名爲力安隱道用名七覺安  
隱道中行名八正道是爲空見能生道諦四倒除故  
是癡滅癡滅故愛滅愛滅故瞋滅瞋滅故知空非道  
慙愧低頭則是慢滅無復所執則疑滅空見旣具苦  
集苦集非畢竟空執空心破故求我叵得我叵得故  
則身見破身見破故則我見破我見破故邊見破空  
見非道戒取破空非涅槃見取破空不當理邪見破

十使破故八十八使破八十八使破故子縛破子縛  
破故能發初果進成無學果縛破入無餘涅槃是爲  
空見生滅諦卽聲聞法界也若於空見明識四諦則  
知盡苦真道真道伏斷得成賢聖乃至一百四十種  
見單複具足無言等見皆識真道於諸見中能動能  
出若不爾者不見四真諦是故久流轉生死大苦海  
若能見四諦則得斷生死生有旣盡已更不受諸有  
卽此意也次明空見生支佛者空見非空妄謂是空  
顛倒分別倒卽是無明無明故取著空見若知無明  
何所取著若知無明不起取有畢故不造新不造新  
不起取有畢故是不起無明若無無明則成智明故

有智慧時則無煩惱無煩惱時則無明滅無明滅則諸行滅乃至老死滅中論云云何聲聞觀十二因緣義乃說常無常等六十二見問答殆不相應今祇此是答常無常等見皆是無明知無明不起取有卽是聲聞法中十二因緣觀法華云樂獨善寂求自然慧此慧善寂六十二見也又觀剎那空見旣具四諦此空見心爲有爲無剎那心起便具五陰云何言無此卽有支有卽含果亦是因中有果義若作無果者有支有因因義具足有從何生若無取者有則不生取卽五見執空是邊於空計我謂空爲道爲涅槃爲正是爲取支取從愛生愛喜違瞋慢彼疑此此名愛支

愛因愛生受故愛起如受一法愛味追求知受因觸  
以有意根空塵得觸經云觸因緣故生諸受觸由於  
入塵觸諸根故得於入入由名色歌羅邏三事色有  
五胞命能連持識有四陰之名又三事名色由初託  
胎識識由往業業由無明無明是過去顛倒謂有謂  
無一切諸見故能成辦今世色軀經云識種業田愛  
水無明覆蔽生名色芽今復顛倒迷於空見起善惡  
行種於未來名色之芽顛倒又顛倒無明又無明更  
相因緣無有窮已若知無明顛倒不須推畫若有若  
無達其體性本自不實妄想因緣和合故有既知顛  
倒無明卽寢寢故諸行老死皆寢空見無明老死寢

者一百四十諸見無明老死皆寢寢故是破二十五  
有侵除習氣是名空見生支佛法界若於空見識是  
無明無明可滅若不識者尚不出空見爲見造業如  
蠶作繭何得成支佛耶鼻隔禪師發得空見多墮網  
中不能自拔散心法師雖分別諸使亦不自知空見  
過患闇證凡龜盲狗魯吠自行化他全無道氣空見  
生六度菩薩法者旣識空見諦緣卽是知病識藥識  
藥故自欣知病故愍彼欲共衆生離苦求樂空見陰  
界是苦十使等是集念處等是道四倒破是滅約此  
起誓如一空見一日一夜凡生幾許百千億陰一一  
五陰卽是衆生日夜旣爾何況一世何況無量世空

見既爾餘見亦然能生之見既多所生之陰則不可  
數一人尚爾何況多人是爲衆生無邊誓願度如一  
空見念念八十八使餘三見六十二等亦八十八使  
一人尚爾何況多人是名煩惱無量誓願斷如一空  
見修念處道品餘一切見正助之道無量無邊一人  
尚爾多人亦然是爲法門無盡誓願知如一空見煩  
惱滅無量見無量煩惱亦滅一人既爾諸人亦然是  
名無上佛道誓願成若衆生及集是性實者則不可  
度以苦集從因緣生無有自性故苦海可乾集源易  
竭故言度耳觀空起願如上說約空慧行者若執空  
見而行布施者乃是魔施知空見諦緣無常無我等

過則捨空見亦愍於他勸捨空勸而行布施若執空見而持戒者與持雞狗等戒何異知空見無常等過不爲空見所傷慈愍於他令防空見若執空見爲瞋處愛處強行忍者是力不足畏他故忍今知空見無量過患能伏空見及六十二亦勸於他安忍空見若不除空見而精進者雜見非精退入三途非進今知空見空見不起爲精空見業破而得升出名進亦勸於他修此精進若不破空見得禪者多是鬼法今知空過不爲空見所動成正禪正通不爲諂媚憍利以此神通勸化衆生令捨見散入禪若執空見而修智慧愚癡世智今識空見諦緣以無常狼怖空見羊煩



惱脂銷廣起願行功德身肥悲愍衆生令除脂長肉  
若有緣機熟卽坐道場斷結作佛是名空見生六度  
法界觀空見卽是無明無明卽空從無明生一切苦  
集皆不可得何者四倒是橫計寧有信實所治之倒  
非有能治念處云何可得乃至覺道皆悉不生故不  
可得故大品云習應苦空等云二乘知卽空斷苦入  
滅菩薩卽空慈悲願行誓度衆生雖度衆生如度虛  
空雖滅煩惱如與空共斷雖生法門如虛空生雖滅  
衆生實無衆生得滅度者是智是斷是菩薩無生法  
忍是名空見生通教菩薩法界也觀此空見有無量  
相所謂四諦分別校計不可窮盡此無盡者從空見

生空見從無明生所生無量能生亦無量能生既假  
名所生亦是假名推此無明從法性生譬如尋夢知  
由於眠觀此空見而識實相實相卽如來藏無量客  
塵覆此藏理修恒沙法門顯清淨性是名空見生別  
教法也空見生圓教法如前如後複次見惑浩浩如  
四十里水思惑殘勢如一滄水前諸方便共治見惑  
惑盡名爲入流任運不退見惑難除巧須方便成論  
云以空治惑若空治得入不俟餘法若不入者更設  
何治如水中生火水不能滅空見起過空何能治今  
知空見苦集之病然後用諦智治之三藏無常智通  
家卽空智皆前除見別亦前除見入空次善巧出假

如空中種樹圓雖不作意除見見自前除除堅牢見  
種種方治云何直言但以空治邪云何諸治共治一  
見如患冷用四種藥服薑桂者去病復力服五石者  
病去益色服重婁者加壽能飛服金丹者成大仙人  
病同一種藥法爲異得力亦異四教治見見盡解異  
治見旣爾治餘亦然此四治者卽是四念處遺教令  
依四念處修道得出火宅所以者何一空見心卽三  
界三界無別法唯是一心作空見生六道業受六道  
身居六道處處卽火宅身居卽苦具業卽鬼神競共  
推排三車自運乃得出耳三車卽是三藏中三乘念  
處亦是通中三人共一念處又是別方便中三種念

處真實一種念處又圓一實念處略說九種四念處  
中說九種道品廣說九種四諦是諸念處皆能治見  
得出火宅遺囑之意義在於此但釋迦初出先示三  
人各用四念處此如法華羊鹿牛車各出火宅次說  
三人同修一念處此如大品是乘從三界出到薩婆  
若中住亦如大集三乘之人同以無言說道斷煩惱  
次說菩薩修次第念處比如大品不共般若諸念處  
乘別而未合後說一切小大同一念處此如法華同  
乘大車直至道場約此空見明諸惑明諸治與諸經  
論不相違背一微塵中有大千經卷卽此意也次明  
不思議境者一念空見具十法界卽是法性法性更

非遠物卽是空見心淨名云諸佛解脫當於衆生心  
行中求當於六十二見中求三法不異故宛轉相指  
一切衆生卽是菩提不可復得卽圓淨解脫五陰卽  
是涅槃不可復滅卽方便淨解脫衆生如卽佛如是  
性淨解脫佛解脫者卽是色解脫等五種涅槃空見  
心卽是汙穢五陰五陰卽有衆生衆生卽有五陰名  
色衆生更互相縛不得相離觀此五陰卽是涅槃不  
可復滅本無繫縛卽是解脫本有解脫攝一切法故  
言解脫卽心而求又觀見心五陰卽是法性便無復  
見心五陰因滅是色獲得常色等法性五陰因滅衆  
生獲得常住法性衆生能一色一切色一識一切識

一衆生一切衆生不相妨礙如明鏡淨現衆色像是  
名性淨三種解脫不得相離不縱不橫不可思議圓  
滿具足空見中求是名不可思議境此境無明法性  
宛然具足傷已昏沈令始覺知一切衆生亦復如是  
既是法性那不起慈既是無明那不起悲觀此空見  
本性空寂淨若虛空善巧安心研此二法見陰見假  
四句不生單複諸句句句有苦集無明蔽塞句句有  
道滅等通觀空見一陰一切陰三諦不動則了法身  
觀不動陰非淨非不淨等雙樹涅槃亦是道場是觀  
名般若八倒破名解脫於一念處起一切念處調伏  
衆生如是三法非因非果非因而因念處是道場非

果而果雙樹中間而入涅槃於空見不動而修不思  
議二十七品如是徧破不得空見名空三昧不見空  
相名無相三昧如是三昧不從真緣生名無作三昧  
若不入者發大誓願內捨執見外棄命財空見乖理  
戒不清淨誓令空見不犯法身守護七支不撓舍識  
若空見喧動中忍不成今誓苦到安心空見如橋地  
海總集我身心終不動若空見閒雜誓純一專精念  
念流入又空見擾動不能安一至誠懺悔息二攀緣  
一切種智不開者無明未破誓觀空見法性現前剛  
決進勇不證不休如是對治助開涅槃深識位次不  
濫上地內外風塵不能破壞順道法愛不生故無頂

墮心心寂滅流入薩婆若海乘一大車遊於四方直至道場成得正覺餘如上說云

摩訶止觀卷第十